

讀書附志



肆



昭德先生郡齋讀書志卷第五上

附志

江西漕貢進士秘書省校勘書籍趙希弁

經類

石經周易

右周易十卷經註六萬六千八百四十四字將仕郎

守國子助教臣楊鈞朝議郎守國子毛詩博士柱國

臣孫逢吉書

石經尚書

右尚書十三卷經註并序八萬一千九百四十四字

將仕郎試秘書省校書郎臣周德貞書鑄王冊官陳德超鑄

石經毛詩

右毛詩二十卷經註一十四萬六千七百四十字將仕郎試秘書省校書郎張紹文書

石經周禮

右周禮十二卷經註一十六萬三千一百單三字將仕郎試秘書省校書郎孫明吉書

石經儀禮

右儀禮十七卷經註一十六萬五百七十三字將仕

郎試秘書省校書郎張紹文書

石經禮記

右禮記二十卷經註十九萬六千七百五十一字卷

首題曰御刪定禮記月令第一集賢院學士尚書左

僕射兼右相吏部尚書修國史上柱國晉國公臣林甫奉勅註曲禮為第二蓋唐明皇刪定之本也將仕

郎試秘書省校書郎張紹文書

石經春秋

右春秋經傳集解二十卷經註并序三十四萬五千一百四十四字不題所書人姓氏

石經公羊

右公羊十二卷。經註一十三萬一千五百一十四字。不題所書人姓氏。

石經穀梁

右穀梁十二卷。經註八萬一千六百二十字。不題所書人姓氏。

石經論語

右論語十卷。經註并序三萬五千三百六十八字。將仕郎前守簡州平泉縣令兼殿中侍御史賜緋魚袋張德釗書。潁川郡陳德謙鐫字。

石經孝經

右孝經一卷。經註并序四千九百八十五字。不題所書人姓氏。但題潁川郡陳德謙鐫字。

石經孟子

右孟子十四卷。不題經註字數若干。亦不題所書人姓氏。

石經爾雅

右爾雅三卷。將仕郎前守簡州平泉縣令賜緋魚袋張德釗書。武令昇鐫。不題經註字數若干。

以上石室十三經。蓋孟昶時所鐫。故周易後書廣政

十四年歲次辛亥五月二十日唯三傳至皇祐初方
畢故公羊傳後書大宋皇祐元年歲次己丑九月辛
卯朔十五日乙巳工畢又書將仕郎試國子四門助
教州學講說何維翰將仕郎試秘書省校書郎州學
說書黃柬儒林郎試秘書省校書郎守華陽縣尉州
學勾當王尚詰朝奉郎秘書省著作佐郎簽署節度
判官廳公事武騎尉管勾州學華叅奉直郎尚書屯
田員外郎通判軍州兼管內橋道勸農事及提舉渠
堰騎都尉借緋提舉州學解程朝奉郎尚書屯田員
外郎通判軍州兼管內勸農事及提舉渠堰輕車都

尉借緋提舉州學聶世卿提點益州路諸州軍州獄
兼本路勸農提舉渠堰公事朝奉郎尚書比部員外
郎護軍借紫孫長卿益州路諸州水陸計度轉運使
兼本路勸農使朝奉郎尚書刑部員外郎直史館上
騎都尉賜緋魚袋借紫曹穎叔樞密直學士朝散大
夫右諫議大夫知益州軍州事兼管內橋道勸農使
充益利路屯駐泊本城兵馬鈐轄提舉益利路諸
州軍兵甲巡檢賊盜公事上騎都尉京兆郡開國侯
食邑一千戶賜紫金魚袋田況

春秋穀梁傳註疏二十卷

右唐國子四門助教楊士勛撰昭德先生讀書志中有諸經註疏獨無穀梁註疏云

經解類

經說三十卷

右晦菴先生朱文公熹仲晦之說也易說啟蒙三卷大易問答兩卷尚書問答三卷毛詩問答一卷禮記問答一卷中庸問答二卷大學問答二卷周禮春秋問答一卷論語問答并拾遺八卷孟子問答并拾遺并孝經刊誤四卷附太極解義太極問答西銘解義問答三卷通爲三十卷邵武黃大昌鄱陽王迂編次

凡六經之要旨論孟之奧義悉可以類而求之延平廖德明爲之序

大易粹言七十卷總論三卷

右集明道先生程顥伯淳伊川先生程頤正叔橫渠先生張載子厚廣平游酢定夫龜山楊時中立兼山郭忠孝立之白雲郭雍子和之說也舒守曾種序

紫巖易傳十卷

右紫巖居士魏國張忠獻公浚德遠所著也

誠齋易傳二十卷

右誠齋先生楊文節公萬里廷秀所著自爲之序

周易本義十卷

右晦菴先生朱文公熹仲晦所定也發例筮儀附

周易繫辭精義二卷

右東萊先生呂成公祖謙伯恭所集也

周易玩辭十六卷

右平菴項安世平父所述也自敘于前其爲說曰君子居則觀其象而玩其辭動則觀其變而玩其占讀易之法盡於此矣程子平生所著獨易傳爲全書今以其所得於易傳者述爲此書而其文無與易傳合者合則無用述此書矣其子寅孫刊于建安書院樂

章識於後

周易總義二十卷

易學舉隅四卷

右山齋易祓彥章所著也陳章李璠爲之序易學舉隅亦祓所著傳疑之說附于後

二五君臣論一卷

右胡寅明仲閻止昕逢辰二侍郎之論也六十四卦各爲之說南軒先生張宣公栻爲之序

卦圖系述五卷

右卦圖三卷皇極經世篇系述一卷康節邵先生之

說而先生之子伯溫所學也簡池趙震敘而刻之

皇極經世指要二卷

右蔡先定季通所序也以伏羲卦圖列之於前而以皇極經世疏之于後季通建陽人朱文公之益友始辭聘命終預黨名嘉定更化贈以初品

著卦辨疑三卷

右上卷康節先生撰著法橫渠先生大衍說伊川先生撰著法兼山郭先生著數說下卷則辨證也兼山之子雍爲之序謝良齋識其後云

卦氣圖一卷

右祝融樂洪德秀所著也河南郭雍爲之序德秀嘗從文定胡公父子游取飲水曲肱之義名所居之堂故號曲肱先生云

象爻說二卷

右武林吳準齋如愚所著也一則明象二則明爻喬文惠公行簡嘗薦之曰成忠即吳如愚隨身右列尋即隱居雖在都城而杜門不出臣欲識之而不可得其人行醇而介氣直而溫講道窮經賸有著述欲乞特與換授從事郎併與秘閣校勘有旨從之而如愚不受

書說六卷

右東萊先生呂成公祖謙之說也自洛誥至秦誓凡一十七篇或謂先生之說始於秦誓上至洛誥而止云

書說精義三卷

右西山先生真文忠公德秀之說也

書集傳六卷

右晦菴先生朱文公訂正而武夷蔡沉集傳也沉自序于前其子奉議郎秘書省著作佐郎兼權右侍郎官兼樞密院編修官兼諸王宮大小學教授杭進於

朝沉字仲默號九峰先生真西山撰其墓表今附於後

詩集傳二十卷詩序辨說一卷

右晦菴先生朱文公所定也江西漕趙崇憲刻於計臺而識其後

周禮說三卷

右朝奉郎秘書少監陳傅良所進也舊刊於止齋文集中曹叔遠別為一書而刻之且為之說

周禮攷疑七卷

右祝融居士樂思忠仲恕所著也永嘉戴溪肖望豐

城劉德秀仲洪爲之序

周禮總義三十卷

右山齋易被所著也許儀爲之序刻於衡陽

禮記要義二卷

右荆國文公王安石介甫所著也

中庸章句一卷或問二卷

中庸輯畧二卷

大學章句一卷或問二卷

右晦翁先生既定著章句於經文之下又述平時問答所疑以爲或問中庸又述輯畧兩卷蓋集伊洛諸

儒之說也希弁所藏各兩本嶽麓書院精舍及白鹿洞書院所刊者

春秋集解三十卷

右東萊先生所著也長沙陳邕和父爲之序

春秋左氏後傳十二卷

春秋左氏章指十七卷

右止齋陳傳良所著也四明樓忠簡公鑰序其前清海崔清獻公與之識其後而刻於維揚郡序

春秋左氏國紀二十卷

右清江徐得之所編也自周而下各繫以國又因事

而爲之論斷止齋陳傅良序之

春秋左氏博議二十五卷

右東萊先生所著也自爲之序

春秋分記九十卷

右克齋程公說伯剛所編也其弟公許守宜春刻于郡齋游丞相伯爲之序

左氏連璧八卷

右三山葉儀鳳子儀撰乃對偶之書也

三傳分門事類十二卷

右莫詳誰氏所編以類相從而分其門也

論語筆解十卷

右唐昌黎先生韓文公之說也其間翺曰者李習之也始愈筆大義以示翺翺從而交相明辨非獨文公制此書也韓文補云公作論語傳未成而沒見於張藉祭詩辨之於洪慶善者明矣今世所傳如宰予晝寢以晝作晝子在齊聞韶三月不知肉味以三月作音浴乎沂以浴作浴子在回何敢死以死作先之類雖未必然而爲伊川之學者皆取之此本乃秘書丞許勃所序者

論語直解十卷

右漢上先生朱文定公震所著也。紹興五年夏肇建資善堂時，孝廟富於春秋，文定以起居郎與宗正卿范公冲同爲翊善，朝論皆以爲極天下之選。此解資善堂錄本也。其孫繼先刻于瀏陽學舍，而識其後。

孟子解兩卷

右和靜先生尹侍講焯所著也。先生乃伊川之高弟，欽宗累聘不起，賜號和靜。紹興初再以崇政殿說書召，旣侍講筵，首解論語以進，繼解孟子甫及終篇而卒。此本乃邢正夫刻于岳陽泮宮者。

論語解二十卷

孟子解二十六卷

右無垢先生張文忠公九成子韶所著也。

論語精義十卷

孟子精義十四卷

右明道伊川橫渠三先生。成都范氏、滎陽呂氏、藍田呂氏、上蔡謝氏、建安游氏、延平楊氏、河東侯氏、河南尹氏十一人之說。晦菴先生所編集也。初目精義，後改集義。卷末淳熙辛丑冬至前五日點畢十一字，乃先君子戒菴居士師回手澤也。

論語集註十卷

孟子集註十四卷

右朱文公所著也先生之於語孟始集程張呂范十
一人之說以爲集義既又本之註疏參之釋文採之
儒先斷之詳說以爲集註語孟之精微蓋萃於此書
矣希弁所藏各兩本嶽麓白鹿洞所刊也

論語說三卷

孟子說七卷

右南軒先生張宣公栻敬夫所著也

論語註義問答通釋一十卷

右勉齋黃先生幹通釋晦菴先生集註或問之書也

孝經義一卷

右荆國文公王安石所著也凡十七章喪親章闕之

孝經刊誤一卷

右朱文公所定也皆以古文爲正惟傳之六章或從
今文廬山胡冰敘于後

小學類

弟子職一卷

右弟子職一書雜見於管子之篇朱文公揭其入學
受業事師之法以爲章句參以衆說輔其註文云

敘古千文一卷

右致堂先生胡寅明仲所作也南康黃西坡灝商伯
爲之傳晦菴朱文公題其後曰敘事立言昭陳法式
實有春秋經世之志至於發明道統開示德門又于
卒章深致意焉新學小童朝夕誦之而諷其義亦足
以養正於蒙矣

續千文一卷

右佐朝散大夫知池州軍州事賜紫金魚袋侍其瑗
字良器所著也昔周興嗣次王逸少所書千字爲韻
語以便觀省後世謂之千文良器遷避興嗣所用字
別製千言以續之山谷嘗抵以書曰引辭連類使不
相舐觸甚有功當與凡將急就並行也葛文康公勝
仲爲之序

百體書千文一卷

右良齋謝公諤題其後曰神剡天畫千類萬狀豈止
汲冢魯壁周鼓秦山耶

敘古蒙求一卷

右五峰先生胡宏所著也自羲農至于五代周凡三
十章毛以謨爲之序先生之子大牝書而刻之

通鑑韻語九卷

右黃日新齊賢所著也大畧如李瀚蒙求四言體而

列其事於左方周平園朱晦翁洪容齋謝良齋楊誠齋樓攻愧諸老先生皆爲之序齊賢臨川人

字義三卷

右北溪陳淳安卿所著也安卿臨潼人

史韻四十九卷

右回谿錢諷正初所編也依唐韻分四聲而以十七史之句註于下諷錢塘人鄭僑錢文子爲之序

篆韻五卷

右徐鉉序蓋其弟錯所集也鉉字鼎臣仕南唐爲昭文館學士入朝爲太子率更令太平興國初詔以本

官直學士院錯字楚金仕南唐爲右內史舍人卒李煜贈之禮部侍郎云

隸韻七卷

右洪文惠公适隸釋序冠於前周益公誌其神道碑云耽嗜隸古爲纂釋二十七卷隸續二十一卷

十二先生詩宗集韻二十卷

右裴良甫師聖編杜甫李白高適韓愈柳宗元孟郊歐陽修曾鞏蘇軾王安石黃庭堅陳無已之詩韻也

史類

補史記一百三十卷

右唐司馬貞補司馬遷之書也。補三皇紀於五帝之前。每篇各註索隱之說。以百三十篇贊附於每篇之末。希弁嘗考諸家之說。爲讀史補註一書。頗加詳焉。

古史六十卷

右蘇文定公轍所作也。自伏羲神農訖秦始皇帝。爲七本紀。十六世家。三十七列傳。以補司馬遷之缺云。

西漢刊誤一卷 東漢刊誤一卷

右宣德郎守太常博士充國子監直講劉攽所撰也。仁宗讀後漢書。見墾田字。皆作懇字。使侍中傳詔中書。使刊正之。攽爲學官。遂刊其誤。爲一書云。

西漢補遺一卷

右何備德輔補西漢之遺文也。蓋東哲補詩之義耳。希弁嘗讀其皇太子遺四皓書。及侯公說項羽辭。因思昔東坡先生亦嘗爲侯公說項羽辭。載於集中。而商芸小說載張良所與南山四皓書。則世所罕見也。其書曰。良白。仰惟先生秉超世之殊操。身在六合之間。志凌造化之表。但自大漢受命。頑靈顯集。神母告符。足以宅兆民之心。先生當於此時。耀神爽乎雲霄。濯鳳翼於天漢。使九門之外。有非常之客。北闕之下。有神氣之賓。而淵潛山隱。竊爲先生不取也。良以頑

薄承乏忝官。所謂絕景不御。而駕服駑駘。方今元首
欽明文思。百揆之佐。立則延首。坐則引領。日仄而方
文不御。夜眠而閭闔不閉。蓋皇極須日月以揚光。后
土待嶽瀆以導滯。而當聖世。鸞鳳林栖。不翔乎太清。
騏驎嶽遁。不步乎郊藪。非所以寧八荒。慰六合也。不
得侍省。展布腹心。畧寫至言。想望翻然。不猜其意。張
良白。備乾道中權工侍兼權直院。

西漢補註一十卷

右國子博士吳華商卿所著也。倪思爲之序。

史記法語十卷

前漢法語二十卷

東漢精語十六卷

三國志精語六卷

右鄱陽洪文敏公邁所著也。

東都事畧一百三十卷

右承議郎知龍州王稱所進也。本紀十二。世家五。列
傳一百五。附錄八。間爲贊論以發揚之。以其國都大
梁以前之事故。謂之東都。然其中疎駁甚多。稱眉山
人。故禮部侍郎賞之子。此書旣進。遂直中秘云。

編年類

皇王大紀八十卷

右五峰先生胡宏所述皇帝王伯之事。始於盤古氏而終於周之末。自堯以上六闕。逢無紀。堯之初載。迄于赧王乙巳。二千有三十年。貫通經典。採摭史傳。靡所不載。又因事而爲之論。所以述去取之原。釋疑似之惑者。至矣。先生字仁仲。文定公之季子。自幼有志於道。嘗見楊中立于京師。又從侯師聖于荆門。而卒傳文定公之學。紹定戊子。希弁生。父師回爲衡山令。嘗奉朝旨索其書云。

通史緣起二十卷

右會稽胡衛之作也。其說謂伏羲氏神農氏軒轅氏三皇也。少昊氏高陽氏高辛氏合唐虞氏五帝也。不可不備。乃推盤古以來衆說之異同。雖十紀浩茫。難以年考。而傳疑傳信。有理存焉。衛嘗仕於朝云。

晉春秋二十卷

石隋秘書省正字杜延業所述。其自序云。蕭方等採削群史。著三十國春秋。囊括兩晉之言。網羅諸國之事。以晉國爲主。附列二十九國。延業刪緝。題曰晉春秋。載於唐書藝文志。

南北征伐編年二十卷

右吳曾編集自漢獻帝迄於周世宗其意謂資治通鑑征伐之事雜見於列國言動之間讀者不得專一稽攷至南北議論亦未詳盡遂效其體凡一征一伐靡所不載紹興辛巳 盟 廟堂知有是書嘗取以備乙覽云曾字虎臣撫之崇仁人京文忠公鏜為之序

五代春秋五卷

右河南先生尹洙師魯所作也由梁太祖開平元年四月甲子迄于周顯德七年正月甲辰

資治通鑑綱目五十九卷序例一卷

右晦菴先生朱文公所編也司馬文正既為資治通鑑又別為目錄及舉要曆胡文定復修舉要補遺朱文公因文正文定兩公四書別為義例表歲以首年而因年以著統大書以提要而分註以備言其綱倣春秋而叅取羣史之長其目效左傳而稽合諸儒之粹真德秀刻于泉南陳孔碩李方子敘其後希弁所藏夔本為板四千二百有奇吉本二千八百而且無陳李二公之序希弁又嘗叅以泉本校其去取之不同并考溫公文公之書法為資治通鑑綱目考異淳祐丙午秘省嘗下本州借本書寫云

資治通鑑綱目提要五十九卷

右資治通鑑綱目提要存其綱而去其目如春秋之經也希弁所藏乃趙希栗刻于廬陵者

續資治通鑑長編九百四十六卷

右吳巖先生李文簡公燾仁甫所修也太祖至英宗一百七十五卷神宗朝二百二十八卷哲宗朝二百二十卷徽宗朝三百二十三卷其書倣司馬氏通鑑踵爲之然燾謙抑不敢名續通鑑但謂續長編蜀帥汪應辰嘗乞給筆札以寫藏秘閣乾道六年正月令秘書省依通鑑紙樣及字樣大小繕寫一部仍將燾

銜位於卷首依司馬光銜位書寫進入燾之卒也上語宇文价云朕嘗許燾大書續資治通鑑長編七大字且用神宗賜司馬光故事爲序冠篇不謂其止此也希弁所藏蜀本視書坊所刊者爲詳希弁嘗爲續資治通鑑長編補註一書以補詔勅奏篇等闕云

國朝編年政要四十卷

右兵部尚書太子詹事蔡文懿公幼學所編也自太祖建隆之元迄于欽宗靖康之末祖春秋之法而參以司馬公舉要曆呂氏大事記之例宰輔拜罷表諸年首其子朝請大夫直秘閣提舉福建路常平義倉

茶事籥敘而刻之

皇朝編年備要二十九卷

中興編年備要十卷

右壺山陳均所編其書用國史實錄等書爲編年體例起于建隆迄于淳熙書法蓋倣綱目之例而加斟酌焉真德秀鄭性之林崑皆爲之序

開基事要十卷

右朝奉郎秘書少監皇子嘉王府贊讀陳傅良所進也自建隆之初迄開寶之末亦曰建隆編曹叔遠序而刻之

仁宗君臣政要四十卷

右文林郎守秘書丞監閩州商稅院市買稅鹽臣張唐英編進起天聖終嘉祐詔令刑政之要禮樂選舉之法郊廟祭祀邊鄙備禦罔不備錄其間名臣得其家世之詳者爲之立傳否則闕之唐英字次功自號黃松子

續紀年通譜一卷

右宣議郎致仕畢仲荀續宋元憲公紀年通譜之書也元憲止於慶曆辛巳仲荀起于慶曆壬午而迄于徽宗

丁未錄二百卷

右左修職郎監臨安府都鹽倉李丙所編也。上帙起名王安石爲翰林學士。迄于神宗皇帝升遐。中帙起宣仁聖烈垂簾除呂公著侍讀。迄于宣仁聖烈祔廟。下帙起李清臣進策題。迄于誅童貫。安石之名實治平丁未之所始。故以丁未名之。

三朝北盟集編二百五十卷集補五十卷

右朝散大夫充荆湖北路安撫司參議官徐夢莘編集。上帙起政和七年七月庚寅。終宣和七年十二月庚申。中帙起宣和七年十二月庚申。終靖康二年四月丁亥。集補則補其遺也。

建炎以來中興繫年表錄二百卷

右陵陽布衣李心傳徵之所修也。知瀘州許奕奏進之。修國史曾喚文嘗乞令其弟太常博士道傳繳進。得旨降付國史院。然其中闕疑尚多。希弁嘗爲補註一書。頗爲詳備云。

寧宗皇帝紀十卷

右四朝國史中之本紀也。

續稽古錄一卷

右太社令龔頤正續司馬文正稽古錄之書也文正止於治平頤正起於熙寧而迄于寧宗之初袁說文棨于成都趙彥勵復棨于長沙未幾有毀版之旨云

通鑑問疑一卷

右秘書丞高安劉恕字道原嘗與司馬公修通鑑司馬公深愛其博學每以所疑問焉恕子義仲纂集其往復相難者而作此書十國紀年序附于後

綱目發明五十九卷

右建康布衣尹起莘所著以發明綱目義例別之傑帥金陵進其書于朝魏文靖公了翁爲之序

綱目論斷二十卷

右江珪呂中論大書以提要正變例而爲之斷云其間所載徐清叟跋有以知端平初元通鑑綱目上塵乙覽之因

雜史類

靖康傳信錄三卷

右李忠定公綱爲尚書右丞充親征行營使及以知樞密院事爲河北河東路宣撫使時事也

建炎進退志總序四卷

右李忠定公綱爲正議大夫尚書右僕射兼中書侍

郎至於罷爲觀文殿大學士提舉杭州洞霄宮時事也

建炎時政記三卷

右李忠定公綱所編也自建炎元年五月一日以後至於八月十八日

紹興正論一卷

右編錄秦檜當國羅織諸賢或死於市朝或死於囹圄或死於貶所或流落于魑魅之區累赦不移或棲遲於林泉之下屏跡不出者一百一十八人姓名與其獲罪之因但云瀟湘樵夫序不知其爲誰也

朝野遺事一卷

右趙子崧伯山所著記中興以前凡一百二十有五事自號鑑堂居士終於延康殿學士右中奉大夫淳熙中周益公帥長沙命項安世丁朝佐楊長孺讐校而刻之

朝野雜記甲集二十卷乙集二十卷

右李心傳微之所編中興以來之事也繫年錄蓋倣於此

史評類

讀史管見三十卷

右致堂先生胡寅明仲所著也意謂二百四十二年之後至于五代司馬文正所述資治通鑑事雖備而立義少遂用春秋經旨尚論詳評晦菴綱目中多取之猶子大壯序其說孫德輿刻于衡陽

讀史明辨二十卷

右伊川元城龜山了齋橫渠屏山橫浦五峰東萊南軒止齋致堂十二先生史論也

史說十卷

右東萊先生呂成公之說也

史評六卷

右誠齋先生楊文節公萬里之評也

西漢鑑十卷

右國子博士吳莘所著也王容爲之序

兩漢博議二十卷

右陳季雅彥羣所撰也

唐史論斷二卷

右朝散大夫尚書刑部郎中充天章閣待制兼侍讀孫甫之翰所撰也甫陽翟人國史有傳

唐論二卷

右宣教郎前太平州州學教授王居中撰程公許韓

祥韓補皆序之

職官類

漢官考四卷

右徐筠孟堅所著也西京二百年品秩爵列位號名數自三公而下至於筦庫釐爲十九門總一百四十九條韋楫爲之序孟堅清江人淳熙甲辰進士

職官分紀五十卷

右孫逢吉彥同所集也以楊侃職林而廣之其載新制而又增門目之亡缺補事實之遺漏元祐中趙叡秦觀爲之序

職源五十卷

右王益之等所編歷代置官本末也官之故實職之典掌前賢遺跡先朝訓詞以次列焉

翰苑羣書三卷

右唐李肇翰林志元稹承旨學士院記韋處厚翰林學士記韋執誼翰林院故事楊鉅翰林學士院舊規皇朝禁林讌會集爲一卷錢惟演金坡遺事晁迥別書金坡遺事李宗諤翰苑雜記爲一卷蘇易簡續翰林志蘇耆次續翰林志學士年表翰苑題名翰苑遺事爲一卷

祖宗官制舊典三卷

右東萊蔡元道所編也其子與宗敘于後云追記祖宗舊典凡設官任職治民理財之要與夫分別流品謹惜名器之道合七十七門云

玉堂雜記三卷

右周益公必大記玉堂中事也丁朝佐謂九重之美德前輩之典刑恩數之異同典故之沿革皆因事而見之云

鑾坡錄一卷

右周益公必大記初除翰林日制誥表章也

刑法類

養賢錄二十二卷

右王日休所編也以嘉祐元豐政和紹興勅令格式嘉祐政和祿令紹興祿秩吏部七司條法紹興免役令叅攷編類其舊法不行於今者亦存之以見沿革云日休字作德鈞臺人也

治縣法十卷

右呂惠卿所著也曰法令曰詞訟曰刑獄曰簿曆曰催科曰給納曰災傷曰盜賊曰勸課曰教化惠卿自序於前紹聖二年九月也所在多刊此法豈非不以

人廢言與

常平役法一卷

右紹興以來臣僚申請士民陳訴備載于中按朱文公語錄乃朝廷頒降者

儀註類

儀禮經傳通解續纂祭禮十四卷

右朱文公編集而喪祭二禮未就屬之勉齋先生勉齋既成喪禮而祭禮未就又屬之楊信齋信齋據二先生藁本參以舊聞定爲十四卷爲門八十一鄭逢辰爲江西倉進其本于朝信齋福州人名復字茂才

書既奏贈文林郎

家禮五卷

右朱文公所定而趙崇思刻之萍鄉者潘時舉李道傳黃榦廖德明陳光祖序跋附焉

家禮附註五卷

右陳雷刻于溫州學宮者凡九十九條

呂氏鄉約一卷鄉儀一卷

右二書呂和叔季明所定也朱文公記于後

司馬公居家雜儀一卷

右溫國文正公光所著也

天文卜算類

躔度分野列宿圖二卷

右自河圖洛書以及列宿圖其象於上而列漢晉隋志之說于下

律呂本原一卷

右蔡元定季通所著也曰黃鍾曰黃鍾之實曰黃鍾生十二律曰十二律之實曰變律曰律生五聲圖曰變聲曰八十四聲圖曰六十調圖曰候氣曰審度曰嘉量曰謹權衡凡十三篇云

五行類

拜命曆一卷

右趙景先集其自序曰此書常式陰陽家莫能曉今則不敢傳諸該博愚嘗得自名流用之皆驗故集成此以示子孫自非洞於此道他人幸勿妄傳也趙師俠誌于後

地理類

長安志二十卷

右龍圖閣直學士右諫議大夫修國史常山宋敏求所撰也熙寧九年二月五日太常博士充集賢校理崇文院檢討同知宗正丞事趙彥若序敏求亦嘗爲

河南志時以朝奉郎守太常丞充集賢校理編修唐書官通判西京畱守司兼畿內勸農事飛騎尉署街元豐六年二月戊辰端明殿學士兼翰林院侍讀學士司馬光序讀書志中有河南志而無長安志云

職方乘三卷後集十四卷

豫章

右洪芻所編也曰郡縣曰城宇曰山曰水曰觀寺曰祠廟曰冢墓曰寶瑞曰妖異曰牧守曰仙真曰人物凡十二部芻字駒父自少以詩名取重於時登進士第爲晉州學官山谷素稱其才嘗曰甥之文學他日當大成但願極加意于忠信孝友之地甘受和白和

采不但用文章照映今古乃所望也又嘗作釋權以遺山谷山谷答曰筆力縱橫極見日新之功芻之名因是益顯靖康之初爲尚書郎三遷至諫議大夫遭變坐事貶文登有老圃集行於世續之者淳熙中帥程叔達也李大異序於後

建康志十卷續志十卷

右帥史正志所修而爲之序乾道五年三月也慶元六年八月帥吳玘續之又爲之序

長沙志五十二卷

右紹興辛亥帥趙善俊修而爲之序

宜春志十卷集八卷續修志四卷集六卷

右嘉定中守滕強恕修郡人張嗣古序續志集則嘉熙初守郭正巳也

桂海虞衡志三卷

右范文穆公成大帥靜江日志其風物土宜也自爲之序

靜江志十二卷

右嘉泰癸亥帥蔡戡修以高宗皇帝除太傅靜江奉寧軍節度使桂州牧兼鄭州牧制詞冠于篇端

永寧編十五卷

右嘉定中守畱元剛序陳謙所述也敘州敘縣敘山敘川敘賦敘役敘兵敘人敘產敘祠敘遺凡十一類

桃花源集一卷

右紹聖丙子四明姚孳序淳熙庚子邑宰趙彥琇俾新澧陽簿張櫟重修備載晉唐本朝諸公詩文

海南集二十三卷後集十二卷

右海外瓊管之集也於中可見丁晉公蘇長公趙豐公折仲古李泰發胡邦衡諸公之文筆

臨江集三十四卷

右嘉定中守楊恕編郡人劉昌詩序

景陵志十四卷

右嘉定庚辰郡文學林英發修詩文集錄附焉唐陸鴻漸皮日休陸龜蒙皇朝朱昂宋祁晏殊吳育楊徽之蘇紳石延年王禹偁張耒諸公之作爲多

邵陽志一卷

右淳熙壬寅郡文學李韋之序

陵水志三卷

右慶元丙辰郡文學劉奕修詩文附

臨賀志三卷集二卷

右莫詳誰所修也集以蘇東坡答彭賀州啟在

淶江志十二卷

右嘉定中邑令張耕修

龍江志十卷

右嘉定庚午邑丞紹古修令沈燮序

鈴岡志三卷

右嘉定甲戌邑令謝好古修

瑞陽志十卷縣志三卷

右嘉定六年郡守周綸修郡人雷孝友序

梅川志三卷

右寶慶丙戌重修清江張洽序

秋浦新志十六卷

右端平丙申江東倉使兼知池州王伯大修自爲序

富川志三卷

右嘉定甲申守李壽朋修

寧越志三卷

右慶元改元郡守林會修

南嶽總勝集三卷

右紀載南嶽之勝槩也

水簾詩集三卷

右編集水簾洞之詩文也

浯溪集前後續別四集

右自元結中興頌之後凡刻之浯水之崖者皆在焉

卷雪樓集二卷

右集富池昭勇廟記序詩文也廟乃三國甘寧冢封

昭毅武惠遺愛靈顯王

靈應後集十二卷

右集梓潼廟誥勅記敘詩文也范鎮張浚胡世將王

剛中王之望晁公武諸公祝文爲多亦有唐僖宗之

祝文

富文忠八國語錄一卷

右富弼慶曆二年以右正言知制誥爲回謝契丹國信使西上閣門使符惟忠副之惟忠行至武強病卒以知貝州供備庫使恩州團練使張茂實代之所說機宜事件具載錄中弼所爭者獻納二字朝廷竟從晏殊議用納字弼不預也

章忠恪奉使金國語錄一卷

右紹興三年章誼以龍圖閣學士樞密都承旨充軍前奉表通問使給事中孫近副之誼錄其報聘之語也誼字且叟

攬轡錄二卷

右范成大乾道六年以資政殿大學士左中大夫醴泉觀使兼侍讀丹陽郡開國公食邑三千戶食實封八百戶與崇信軍節度使領閣門事兼客省四方館事信安郡開國侯食邑一千六百戶食實封四百戶康潛爲奉使大金國信使副其往返地理日記也成大字至能吳縣人紹興二十四年進士使金歸除中書舍人淳熙五年叅知政事自號石湖孝宗皇帝御書二字以賜之

禹貢疆理廣記六卷

右長沙易祓編而爲之說

方輿勝覽四十二卷後集七卷續集二十卷
右建安祝穆和父編新安呂千伯可序

仰山孚惠廟實錄二十八卷太平興國禪寺
附錄六卷

右嘉定庚午潘侃重編郡守鄭昉誌于後希弁自庚
午以後續錄之爲五卷

夢華錄一卷

右夢想東都之錄也宋敏求京城記載坊門公府宮
寺第宅爲甚詳而不及巷陌店肆節物時好孟元老
記錄舊所經歷而爲此書坦菴趙師俠識其後

金 承安須知一卷

右金 名諱及增修朝官職事俸給格式服制地理
圖之類也承安蓋金主之璟之紀元也時惟丁巳乃
寧宗皇帝慶元三年云

傳記類

古列女傳八卷

右漢都水使者光祿大夫劉向撰又一卷莫知其爲
誰續然亦載於崇文總印王回曾鞏皆序之

百將傳十卷

右東光張預公立所進也由太公而下至于五代之

劉訥凡史辭泛漫而不切於兵者一刪去之或非兵畧而可以資人之智慮者間亦存焉各以孫子兵法題其後次以行事合之

諸葛忠武侯傳一卷

右南軒先生張宣公栻所著也

四將傳四卷

右建炎中興名將劉琦岳飛李顯忠魏勝之傳也史官章頴撰而上之

十二朝名臣言行錄七十二卷

右八朝朱文公所編也四朝乃後人所續者

豐清敏遺事一卷

右李朴所編豐公稷之言行也陳瓘敘次及復官賜謚制尋訪子孫劄子國史列傳附于後朱文公爲後序云

范太史遺事一卷

右范冲所編正獻公祖禹言行也

趙豐公逸事一卷

右門人喻樗方疇諸人所記也

季忠定公行狀三卷

右公之弟綸所述也太常博士兼實錄院檢討官葉

適所撰謚議附于後

胡文定公行狀一卷

右公之子寅寧宏所述也其孫大壯手書而傳之因
附入曾玄諸孫名

朱文公行狀一卷

右門人黃幹所作也

道命錄五卷

右秀巖李心傳所編也自司馬公呂申公韓康公薦
伊川先生劄子至於嘉定錄用伊川先生後人詔旨
中間朝臣之奏疏儒宗之謚議纖悉備載道學興廢

具見於此

張文忠公節義錄四卷

右張公叔夜告勅奏劄書東北行記旌忠愍節廟碑
及事類也

譜謀類

仙源積慶圖二卷

右三祖下宗室派系也

皇族登科題名一卷

右太宗正嗣濮正士暢宗正丞耿延年所編也淳熙
二年成書始於元祐三年李常寧榜于湜令馮厥後

嗣而益之。延年持節鍾官錄木於饒。洪文敏公邁書于後。

安定先生世系述一卷

右胡瑗世系源委也。瑗字翼之，泰州如臯人也。瑗爲人師，言行而身化之，使誠明者遠，昏愚者厲，而頑傲者革。故其爲法嚴而信爲道，久而尊。自景祐明道以來，學者有師，惟瑗與孫復、石介三人。瑗以布衣召見論學，拜校書郎，嘗爲湖州學官。慶曆四年，建太學于京師，有司請下湖州取瑗教學之法，以爲則，名爲諸王宮教授，以疾免。已而以太子中允致仕。皇祐中，召至京師，議樂歲餘，爲光祿寺丞、國子監直講，遷大理寺丞。嘉祐中，遷太子中允，充天章閣侍講。已而又以病不能朝，復以太常博士致仕。東歸之日，太學之諸生與賢士大夫送之東門，執弟子禮，路人嗟歎以爲榮。卒年六十七。世系乃淳熙中沈大臨述。

周元公年譜三卷

右南康所刊也。以元公出處譜之，以年公所作詩文之類附見焉。倪灼跋。

橫渠先生張獻公年譜一卷

右先生之孫同然所編也。譜先生之出處歲月墓表。

謚議封誥及司馬文正謚議之帖魏文靖公請謚之表并哀辭之類附焉希弁又以先生行狀補其闕

三蘇先生年譜一卷

右左朝請大夫權發遣成都府路提點刑獄公事何

綸編

山谷先生年譜三十卷

右先生諸孫管所編也悉譜先生所爲詩文於逐年之左極爲詳備云

朱文公年譜二卷

右先生門人李方子所編也盧壯父刻之於瑞陽者

爲三冊倪灼刻於康廬者爲一冊今兩存之

諸子類

御解老子二卷

右徽宗皇帝之御製也嘗倣唐制命大臣分章句書寫刻石又詔史記老子傳陞于列傳之首自爲一帙前漢古今人表列于上聖今觀此解所謂道者人之所共由德者人之所自得道者亘萬世而無弊德者充一性而常存老子當周之末道降而德衰故著書九九篇以明道德之常而謂之經其辭簡其旨遠學者當默識而深造之其說大槩與政和之詔同

鬻子十四篇

右楚人鬻熊之書也。逢行珪序而註之。漢藝文志云。鬻子六篇。今此本乃十四篇。未詳孰是。然篇或錯亂。又多遺闕。行珪之說已然矣。唐藝文志列于老子之前。蓋謂其爲文王師也。

列子九卷

右列子一書。漢唐及本朝藝文志皆謂八卷。政和中宜春彭俞爲積石軍倅。聞高麗國列子十卷。得其第九篇曰元瑞。於青唐卜者神宗皇帝嘗惡。後漢范曄姓名欲更修之。求東觀記久之不得。繼而高麗以其本來上裕陵厭代。遂不及進。元和中高麗使人言狀。訪於書省。無知者。醫官已死于其家。得之。信乎高麗之多異書也。

孔叢子七卷

右孔子八世孫鮒集先君仲尼子思子上子高子順之言。及已之行事。凡二十一篇。爲六卷。名之曰孔叢子。蓋言有善而叢聚之也。孔臧又以其所爲賦與書。謂之連叢。上下篇爲一卷。附之卷末。其書不見於漢唐藝文志。嘉祐四年提點廣南西路刑獄公事兼本路勸農事朝散郎守尚書屯田郎中上輕車都尉宋

咸始爲註釋以進

慎子一卷

右瀏陽人慎到之書也唐藝文志云慎子十篇慎到撰滕輔註蓋法家云

公孫龍子三卷

右唐藝文志列于名家陳嗣古賈大隱皆嘗爲之註今不辨矣孔叢子第四卷有公孫龍子一卷

劉子五卷

右劉晝字孔昭之書也或云劉勰所撰或曰劉歆之制或謂劉孝標之作袁孝政爲序之際已不能明辨

之矣唐藝文志列于雜家

聶隅子二卷

右閩人黃晞之書也晞好讀書聚數千卷學者多從之著聶隅欻欻瑣微論石介爲直講聞其名使諸生如古禮執羔鴈束帛就里中聘之以補學職晞固辭不就故歐陽文忠公哭徂徠先生詩云羔雁聘黃晞晞驚走隣家是也嘉祐中韓魏公爲樞密使薦之以爲太學助教受命而卒或曰有子甚愚魯所聚及自著書多散失不存

子家子一卷

右眉山家願養正之書也無卷帙篇目姑附于諸子後

莊子解四卷

楊子解一卷

右荆國文公王安石所解也

農家類

農書二卷

右平江陳峻景文所述唐元宗因李泌之請以二月朔爲中和節令百官進農書以示務本而其書不見於史景文輯六經中所載農圃之事參以田牛蠶桑等爲此編以補史記之闕謝良齋諤爲之序

社倉本末一卷

右真文忠公帥潭日所編也其自序云剗其大要使後之君子得以覽觀焉蓋今日之所講求雖不敢不極其至而後來之弊終有不能逆計者存諸家之規畫所以備後日之叅攷也太師史公浩尚書韓公某丞相趙公汝愚舉子條約附焉其說蓋欲拯愚俗殺子之禍云

雜說類

世說新語二卷

右宋臨川王義慶撰梁劉孝標注讀書志引唐藝文志及崇文總目有十卷八卷之疑又云一本極詳一本殊畧未知孰爲正希弁所藏本有紹興八年董奔題其後曰右世說三十六篇世所傳釐爲十卷或作四十五篇而未卷但重出前九卷中所載余家舊本蓋得之王原叔家後得晏元獻公手自校本盡去重複其注亦小加剪裁最爲善本云

宋景文雜詠集二十卷

右宋景文公祁所集也讀書志云雜詠集十卷未詳撰人希弁所藏二十卷題曰宋景文雜詠集有建炎

九年黃邦俊序

孔氏談苑五卷

右孔平仲毅父記錄之文也毅父清江人文仲武仲之弟有續世說行於世

孔氏雜說一卷

右孔平仲毅父之記錄也圖志謂之珩璜論

公是先生弟子記一卷

右劉敞原父之說也謝良齋得之於劉司業焯以遺清江守江溥刻之趙不黯以閣下本校正而識其後云如叔貢問尚書記人之功下闕五段梓慶削木爲

錄至不敢以爵賞撓其慮下缺七段文勢差錯至不可讀其他以二段爲一段爲二者皆正之

東萊呂紫微雜說一卷師友雜志一卷詩話一卷

右呂本中字居仁之說也鄭寅刻之廬陵

春明退朝錄五卷

右宋常山公敏求所錄也讀書志云春明退朝錄三卷希弁所藏一本三卷又一本五卷凡多七十有八條云

侯鯖錄八卷

右聊復翁趙令時德麟之說也取王氏五侯鯖之義而名之

避暑錄十五卷

右葉夢得少蘊之說也少蘊蘇州吳縣人紹聖四年進士建炎初爲翰林學士拜戶書遷尚書左丞終於崇信軍節度使自號石林云

能改齋漫錄二十卷

右吳曾虎臣所纂也曰事始曰辨誤曰事實曰公襲曰地理曰議論曰記詩曰紀事曰記文曰類對曰方物曰樂府曰神仙詭怪曰詼諧戲謔一一載之曾臨

川人嘗主奉常簿入玉牒爲檢討官能改齋乃其自謂云終於吏部郎

揮塵錄後錄第三錄揮塵餘話二十三卷

右王明清仲言之說也明清汝陰人載朝廷典故賢哲言行爲多

辨志錄一卷

右呂東萊祖謙伯恭所著也四明樓鑰序之

管見錄二十卷

右吳莘商卿之說也論經史并曆爲詳商卿建寧人嘗爲國子博士序則倪思

典刑錄二十卷

右吳宏子大所錄也杜東子野爲之序蓋分門編次先正諸公之言行也

項氏家說十卷附錄四卷

右項安世平父之說也說經史文學爲甚詳平父江陵人自號平庵辛克承刻于江陵郡齋而爲之識

容齋隨筆十六卷續筆十六卷三筆十六卷四筆十六卷五筆十卷

右洪文敏公邁字景盧所著也何異序之

塵史三卷

右王得臣字彥輔所記也其自序云自朝廷至州里
有可稱可法可鑒可誠者類以相從云得臣自號鳳
臺子

却掃篇三卷

右睢陽徐度所著也度字中立丞相處仁之子嘗為
吏部侍郎

示兒編前後集二十四卷

右孫奕季昭所編也蘇大章諸人題于後

兵家類

八陣圖風后握機文馬隆八陣贊獨孤及八

陣記四卷

右蔡元定季通所編次也

車弈或問一卷

右知興國軍胡逸駕所述也自序於前附車戰利害
奏劄于後

類書類

文章緣起一卷

右梁太常卿任昉彥升所集也自秦漢以來聖君賢
士所為文章名之所始備見於中

古今註三卷

右晉太傅永崔豹正熊所註也一輿服二都邑三音
樂四鳥獸五蟲魚六草木七雜註八問答釋義

尊號錄一卷

右宋元憲公庠所編也自漢至于仁宗有序有評有
贊龍圖閣學士提舉寶籙宮宋康年進

十七史類七十七卷

右三山鄭某所編也自周而下每一事相類則編而
次之

西漢總類二十六卷

右沈長卿文伯所編也隨事立門隨門類事他傳所

載總而歸一雖注中有所取者亦皆掇拾而裒集之

長卿雪川人也乾道改元信州教官吳瓊景玉序

唐繪五十卷

右張文忠公九成所著也公嘗謂紀志出於歐陽公
列傳出于宋公天文律曆五行志則劉義叟爲之方
鎮百官表則梅堯臣爲之禮儀兵制初出於王景彝
未竟而卒每患首尾不相貫屬遂總其條綱稽其同
異類聚而區別之

事物紀原十卷

右高承編自天地生植與夫禮樂刑政經籍器用下

至博奕嬉戲之微蟲魚飛走之類無不攷其所自來承開封人雙溪項彬序

補註事類賦三十卷

右吳淑所進也始淑進一字賦百首爲二十卷奉旨令其注釋遂廣爲三十卷云淑渤海人

事文類聚六十卷

右祝穆和父編門分臚列各以羣書要語冠其首次之以古今事實又次之以詩文全篇凡天文地理人事服食器具草木蟲魚靡不備載呂午伯可爲之序

秘府書林二十二卷

右張文伯正夫所編曰天文曰律曆曰五行曰地理曰食貨曰選舉曰百官曰禮樂曰輿服曰祭祀曰藝文曰兵刑凡十二類攷訂歷代及本朝史志爲甚詳國朝會要一百五十卷

右國朝會要起建隆止慶曆凡八十五年章得象所進者

總類國朝會要五百八十八卷

右總類國朝會要由建隆而至乾道也始仁宗命章得象編起建隆止慶曆爲一百五十卷神宗又命王珪續編慶曆四年以後至熙寧末凡三十四年通前

爲三百卷徽宗詔王觀曾肇續編元豐至元符尋又
詔起治平四年止崇寧五年凡四十二年然二書皆
弗克成政和末有司獨上吉禮三類總一百五十卷
蓋通章得象王珪所編者益以熙寧後事也紹興九
年詔館職續編至三十一年又降趣旨孝宗命宰相
提舉閱再歲乃成自神宗之初至于靖康之末凡六
十年總三百卷厥後中興乾道踵而成之此集則合
十一廟爲一書也然中多節畧而始末不全者

會要詳節四十卷

右御史知雜范師道所編也讀書志云節會要十二
卷希弁所藏乃四十卷前有序云師道所節四十卷
先後詳緻無異全本紹興小臣王容清謹題

皇朝大詔令二百四十卷

右宋宣獻公家所編纂也皆中興以前之典故嘉定
三年李大異刻于建寧

本朝事實三十五卷

右莫詳編者姓氏祖宗世次登極紀元詔書聖學御
製郊廟道釋玉牒公主官職爵邑勛臣配享宰執拜
罷科目儀注兵刑律曆籍田財用削平僭偽陞降州
縣經畧夷狄之類具載本末又如聖德頌旌忠碑之

類皆載之

紹述熙豐政事十卷

右政和八年十月一日詔云可以紹述熙豐政事書布告施行此卽布告之本也其列詔書于前而載十人姓名于後今詳書之以見當時之官制云承務郎試明堂平朔頒朔兼禮制局校正內經檢討官臣黃次功承奉郎守明堂總章頒朔臣李伯全宣教郎守明堂青陽頒朔臣嚴裕朝請郎明堂頒朔臣徐秉哲宣教郎試明堂頒事臣蔡仙朝散郎試明堂頒事臣陳公彥朝奉郎試明堂頒政國史編修官臣許翰

通侍大夫康州防禦使提點龍德太一宮提舉入內醫官編類聖濟經提舉太醫學明堂頒朔布政詳定官臣曹孝忠翰林學士知制誥兼侍講同修國史明堂頒朔布政詳定官充編類御筆所禮制局詳議官臣張邦昌檢校少傅護國軍節度使中太一宮使直宣和殿明堂兼在京神霄玉清萬壽宮提舉通領頒朔布政詳定事臣梁師成宣和殿大學士上清寶籙宮使兼神霄玉清萬壽宮副使兼侍讀明堂頒朔布政詳定官編類御筆詳議臣蔡攸

崇觀政宣詔令章奏二十卷

右徽宗皇帝朝詔令章奏分門而類次之

隆平典章三十卷

右建炎至乾道之詔旨及御製之文奏對之章誥詞謚議之類皆分門而敘之如孔子七十二字贊及損齋記皆在焉

高宗寶訓七十卷

右嘉定六年十月史官所上本也

內治聖監二十卷

右彭忠肅公龜年爲起居舍人兼皇子嘉王府直講日所進也上自九重后妃世子旁及宗藩戚里下至

官寺胥史以類紀之而外廷百司度府不與焉公字子壽清江人自號止堂

太平治迹統類四十卷

中興治迹統類三十五卷

右倣通鑑紀事本末條例統而類之事撮其綱辭舉其要上自藝祖而下至於孝宗凡二百門云眉山彭百川編集

雜藝術類

文房圖贊一卷

右和靖後人林可山撰自筆硯而下皆爲之官稱圖

其像於前而列其贊於後序謂唐韓愈舉穎爲中書他竟無所聞今圖贊一十八人擬以官酬之埃異日請于朝罔俾昌黎顯美有唐

采選集四卷

右莫詳誰氏作初彩選格起于唐李郃本朝踵之者有趙明遠尹師魯元豐官制行有宋保國皆取一時官制爲之至劉黃父獨因其法取西漢官秩陞黜次第爲之又取本傳所以陞黜之語注其下局終遂可類次其語爲一傳博戲中最爲雅馴此集尤詳且悉曰階官曰職名曰科目曰賞格曰服色曰俸給曰爵邑謚法之類無一不備

醫家類

御製聖濟經十卷

右徽宗皇帝所製也政和八年五月十一日詔頒之天下學校九月二十四日大司成李邦彥等言乃者從侍臣之請令內外學校課試於聖濟經出題臣等切謂今內經道德經既已選博士訓說乞更以聖濟經附二經兼講從之

陸宣公經驗方二卷

右唐陸宣公贄在忠州時所集而山陰陸游所跋也

或問朱文公曰陸宣公既貶避謗闔門不著書祇爲古今集驗方曰此亦未見陸宣公是處豈無聖賢經傳可以玩索可以討論

濟世全生方指迷集三卷

右考城王貺字子亨所著也吳丞相敏序之曰子亨當官不苟遇世變嘗慨然再請出疆使萬里云

本草單方十五卷

右龍溪林能千編集列三十六門疏二百七十三目自爲之序

鍼灸資生經七卷

右王執中所編也執中東嘉人嘗爲從政郎澧州教授云

四時治要一卷

右永嘉屠鵬字時舉所著戴文端公溪爲之跋

陳氏經驗方五卷

右書林陳先生集李文懿公壁爲之序

神仙類

御序集註無量度人經二卷

右真宗皇帝御製序徽宗皇帝御書而註之會要云宣和六年八月四日詔賜左丞范致虛御書洞元靈

寶無量度人經一部想卽此本也別一本云建中靖國元年四月十二日奉聖旨鏤版而無序無註亦不載於會要朱文公云此經乃杜光庭撰

赤松子中械經一卷

右序云軒轅黃帝遇赤松子授中械經希弁嘗攷國朝大詔令云元符三年九月日制云赤松真君紀于仙籙神農之師可加號赤松凌虛真君疑卽此也然張良亦封忠佑凌虛真人云

玉皇本行集經三卷

右嘉熙四年臨安府承天靈應觀所刻蜀本也程公

許序述爲詳

九天生神章經三卷

右緜州冲虛觀道士王希巢隱賢解玉局散吏程公許爲之序西蜀譙巖趙日休跋朱文公嘗謂此經亦杜光庭所撰

西山十二真君傳一卷

右晉許遜吳猛陳勳周廣曾亨時荷甘載施岑彭杭盱烈鍾離嘉黃仁覽皆得道於西山者政和王册誥詞在其中

皇宋拾遺仙傳一卷

右陳希夷張虛靜朱觀妙徐神公主侍宸劉靜一趙道翁皇甫清虛之事蹟也其中所載御製及誥詞與夫詩記之類爲多。

太上感應篇八卷

右漢嘉夾江隱者李昌齡所編也希弁生父師同嘗爲之序四明史彌志跋其後曰趙公所序禍福善惡之報爲尤詳可謂愛人以德者余嘗守袁喜袁人之樂於趨善因閱是序矍然起敬而程公許湯中雜書之。

竹宮表制一卷

右楊至質字休文太乙宮代言之文也自號勿齊聖上嘗書二字以賜之休文謝表云先儒德秀嘗貽金石之文督府了翁復賁蟲魚之篆希弁云不若用臣真德秀臣魏了翁休文以爲然。

釋書類

御註四十二章經一卷

右御注未詳歲月希弁嘗聞朱文公云釋氏只四十二章經是他古書其餘皆中國文士潤色成之維摩經亦是南北時人作。

御註大圓覺了義經二卷

右孝宗皇帝賜徑山興聖萬壽禪寺僧寶印者也前刻唐裴休序

大方廣佛華嚴經八十卷普賢行願品一卷
右于闐國三藏沙門實義難陀譯序云天册金輪聖
祐皇帝製者唐武后也希弁嘗攷晉義熙中六十卷
唐聖曆中八十卷普賢行願品乃正元十二年南天
竺烏荼國王手書以進通爲八十一卷厥後李長者
製爲合論四十卷提舉坑冶鑄錢朝奉張大夫乃以
經論合爲一書云李忠定公綱曰廣博妙圓極諸經
之闡奧莫如大方廣佛華嚴經精微條暢爲華嚴之

指南莫如李長者所製合論

妙法蓮華經七卷

右姚秦三藏法師鳩摩羅什譯經本十卷後三卷朝廷所禁云

楞嚴經解十卷

右王荆公安石所解也

圓覺經皆證論二卷

右臨川謝逸序謂王荆公嘗問真淨文禪師曰一切衆生皆證圓覺而圭峰禪師易證爲具謂譯者之訛其義是否真淨曰圭峰之說非是真淨法子德洪述

其師之說而爲之論

淨土文一卷

右王日休所編歷陽張孝祥爲之序日休字虛中龍舒人嘗爲國學進士

般若精義四卷

右金剛般若波羅密經解義也

寂感禪師法語五卷

右寂感禪師印肅語也程公許爲之序淳熙中謝良齋謬所作塔銘附

無庵法語一卷

右孟少保琰與公安僧法東往復之語也陳舜趙希杼爲之序

昭德先生郡齋讀書志卷第五上

君齊讀書志卷五

昭德先生郡齋讀書志卷第五下

附志

江西漕貢進士秘書省校勘書籍趙希弁

楚辭類

楚辭集註八卷後語六卷辨證一卷

右朱文公所定也離騷凡七題二十五篇皆屈原作定為五卷續離騷八題十六篇定為三卷校晁氏本增弔屈原服賦二篇而去七諫九懷九歎九思四篇公謂四篇雖為騷體然詞氣平緩意不深切如無所疾痛而強為呻吟者就其中諫歎猶粗可觀兩三則

甲已甚矣。故雖幸附書尾而人莫之讀。今不復以累篇褻也。賈傅之詞于西京爲最高。且惜誓已著於篇。而二賦尤精。乃不見取。亦不可曉。故并錄以附焉。後語定著五十二篇。公謂屈子者窮而呼天。疾痛而呼父母之詞也。故今所欲取而使繼之者。必其出於幽憂窮蹙。怨慕淒涼之意。乃爲得其餘韻。而宏衍鉅麗之觀。懽愉快適之語。宜不得而與焉。至論其等。則又必以無心而冥會者爲貴。其或有是則雖遠且賤。猶將汲而進之。一有意於求似。則雖迫近如楊柳。亦不得已而取之耳。騷自楚興。公之加意此書。則作牧於楚之後也。或曰有感於趙忠定之變而然。

離騷章句一卷

右呂成公所分也。以離騷經一篇爲十六章。公謂王逸嘗言劉向典校分離騷爲十六卷。班固賈逵各作離騷章句。惟一卷傳焉。餘十五卷闕而不錄。今觀屈平所作凡二十有五。各有篇目。獨此一篇謂之離騷。切意劉向所分。卽此篇。猶一篇之中有數章焉。故嘗因逸之言。卽離騷一篇。反復求之。考其文之起伏。意之先後。固有十六章次第矣。固而分之爲十六章。東萊集中不載。

離騷草木疏四卷

右通直郎行國子錄河南吳仁傑撰慶元間自序

別集類一

申鑒五卷

右後漢荀悅所作也悅字仲豫儉之子也儉早卒悅年十二能說春秋家貧無書每之入間所見篇牘一覽多能誦記尤好著述靈帝時闔官用權士多退身窮處悅乃託疾隱居初辟鎮東將軍曹操府遷黃門侍郎侍講禁中累遷秘書監侍中時政移曹氏天子恭已而已悅志在獻替而謀無所用乃作申鑒五篇其所論辨通見政體既成而奏之其大畧曰前鑒既明後復申之故古之聖王其於仁義也申重而已悅嘗依左氏傳體爲漢紀三十篇又著崇德正論及諸論數十篇建安十四年卒

孔稚珪集十卷

右齊孔稚珪字德璋之文也稚珪道隆孫會稽山陰人爲東南冠族少知名有文彩辭章清拔獨冠當世舉秀才爲安成王法曹叅軍齊高帝時補記室叅軍終于都官尚書散騎常侍太子詹事追贈金紫光祿大夫謚簡子集有序云所爲文章雖行於世竟未撰

集今據其遺逸分爲十卷然莫知其爲誰序也

詩品三卷

右梁征遠記室參軍鍾嶸撰嶸字仲偉南史有傳嶸嘗求譽於沈約約拒之及約卒嶸品古今詩爲評言其優劣云觀休文衆製五言最優齊永明中相王愛文王元長等皆宗附約于時謝朓未適江淹才盡范雲名級又微故稱獨步故當辭宏於謝意淺于江蓋追宿憾以此報約也

陸宣公集二十二卷

右唐陸贄敬輿之文也讀書志云陸贄奏議十二卷

希弁所藏制誥十卷奏草六卷奏議六卷凡二十二卷云

李翰林文集三十卷

右唐李白太白之文也讀書志云二十卷希弁所藏三十卷以常山宋敏求南豐曾鞏序攷之則三十卷爲是然第一卷乃李陽冰魏顥樂史三人所作序李華劉全白范傳正裴敬四人所作誌與碑第二卷以後乃白詩文云

黃氏補千家集註杜工部詩史三十六卷外集二卷

右唐杜甫少陵之詩也嘉定中臨川黃希夢得及其子鶴叔似所補也外集上卷詩二十九首下卷祭遠祖當陽君文祭外祖祖母文爲閩州王史君進論巴蜀安危表東西兩川說凡四篇以唐書本傳冠于前而呂汲公年譜附于後云

昌黎先生文集四十卷外集三卷順宗實錄
五卷附錄三卷

右唐韓愈退之之文也讀書志云韓愈集四十卷集外文一卷希弁所藏合五十一卷嘗以宜春新舊本兼饒本參校又以嘉祐壬寅所刊杭本是正之饒本

刊年譜于目錄之後刊附錄于外集之前又附錄止載九篇而前後共列五序柳開但曰後序亦不書其姓名杭本並無目錄年譜附錄亦無柳開一序趙德之序文錄列于李漢之先歐陽修之記舊本較之他集則異他本所載者六百二十七字杭本所刊者一百六十二字以嘉祐壬寅考之歐陽方在政府刊者不應謬誤豈非後來更改而然歟遂寫杭本歐陽之序饒本汲公之記續於附錄之後石守道秦少游張文潛之論黃魯直蔣頴叔李伯紀之詩鄭介甫之祭文陳元光之集序黃直卿之記新廟真希元之記祠

堂又寫附歐呂二公之後而諸賢評論先生之文者各以其說註於逐篇之上若夫委綏大學宜序天臺之屬此先生除都官郎之誥詞也當攷誰行道德博聞此先生謚文公之法也當攷誰議有所謂示浩初序之書者王逢原代先生之作也續騫驥行之詩者李秦伯廣先生之說也如此類者亦當寫補附錄之缺云

柳先生文集四十五卷外集二卷附錄二卷右唐柳宗元子厚之文也讀書志云柳宗元集三十卷集外文一卷希弁所藏卷帙與劉禹錫四十五通之說同以諸本點校寫諸公評論於逐篇之上附錄中先後失次者正之遺缺者補之若夫昌黎所作先生墓誌祭文他本皆在附錄中惟此本在正符之後蓋禹錫自謂附於第一通之末也朱文公嘗謂柳文後龍城雜記王鈺性之所爲也子厚敘事文字多少筆力此記衰弱之甚皆寓古人詩文中不可曉知底于其中似暗影出云

杜詩辨證一卷

右洪興祖所纂也年譜列于前興祖字慶善鎮之丹陽人也張金刻于興國

韓文考異十卷

右朱文公所定也以南安舉正及祥符杭本嘉祐蜀本李謝所據館閣本考其同異一以文勢義理及它書之可證驗者決之云嘉定戊辰三山鄭自誠刻而敘其後

韓文音義一卷

右右從政郎潭州寧鄉縣丞祝充所進也毛叔度爲之序張杓刻而敘其後

柳文音釋一卷

右南城童宗說編

韓集舉正一卷

右莫詳誰作而說云唐儒郭京有周易舉正三卷蓋以所得王輔嗣韓康伯註定真本舉正傳本之訛題義取云

文標集三卷

右唐集賢學士盧肇之文也肇字子發宜春人幼好學穎拔不羣宜春令盧寧一見奇之曰子異日有聞乎由是愈激厲唐會昌二年預江西解試末送啟謝曰巨鼇鼉屬首冠蓬山主文詢其謂對曰巨鼇不靈頑石右上一座盡笑唐制取士許簾獻所業先察其

素時王起知舉肇爲書以獻起問曰鄉薦如公材幾何對曰皆才選也未易品判然如肇者亦猶沅江之鼈九助賓希繼而同舉黃頗進謁起問如初則曰捨頗其誰才起由是少頗而多肇之謙始李德裕以言事出爲宜春長史嘉肇文行異禮之至是德裕以言事遷大尉總樞柄絕朋黨晚進寒素難游其門獨肇入謁常許袍帶從容談論旣試有期知舉以取士白亦舊例也德裕曰某不薦人然喜今榜得一狀元矣迨試果魁中任著作郎遷京兆府司錄使相盧商裴休盧簡求爭辟之歷集賢學士歙宣池三州刺史所至皆有可紀後爲吉州刺史卒

靈溪集七卷

右唐王貞白之文也貞字有道信州永豐人乾寧二年進士後七年調校書郎手編所爲詩三百篇命曰靈溪集云慶元中洪文敏公邁爲之序

別集二

趙韓王文集五卷

右韓忠獻王趙普之文也讀書志云文集三卷而敘述甚畧希弁所藏文集一冊列劉昌言所作行狀于前記一表疏二十九附手詔批答五奏狀劄子二十

五附御詩二十一。啟狀十。詞帖三。希弁又得其謝請班師批答一表於國史本傳。賀平江南一表及與諸公遺書于國朝文粹通六十八篇。以太宗皇帝御製神道碑冠于帙首。并行狀爲一卷。次以記。又次以表疏。又次以奏狀劄子。又次以啟狀詞帖成五卷。碑稱晚歲酷愛讀書。經史百家常存几案。強記默識。經目諳心。碩學老儒。宛有不及。又爲之銘曰。經綸宏異。學識通該。傳亦稱普。初以吏道聞。寡學術。及爲相。太祖常勸以讀書。晚年手不釋卷。謚以忠獻。取慮國忘家。薦可替否之法也。追封韓王。配享太祖皇帝廟庭。

韓魏王安陽集五十卷

右魏忠獻王韓琦之文也。王安陽人。故以名集。王字稚圭。天聖五年進士第二人。定策三朝。功在國史。神宗皇帝御製神道碑有云。薨前一夕。有大星殞於園中。櫪馬皆鳴。又曰。公奉詔立皇子。句被顧命。立英宗爲皇帝。句立朕以承祖宗之序。可謂定策元勛之臣矣。又爲之銘曰。公行不歸。中夕是悼。尚想公儀。淚落苑草。復御篆十字。填金以冠其額。曰。兩朝顧命。定策元勛之碑。贈尚書令。謚忠獻。取慮國忘家。文賢有成之法也。追封魏王。配享英廟。

楊文公武夷集二十卷

右楊文公億之文也景德丁未公所自編序于前曰
目之武夷蓋山林之士不忘維桑之情雕篆之文竊
懷敝帚之愛命題之意蓋以是也集凡五百七十五
篇公兩爲翰林學士冠準得罪公憂畏而卒自唐大
中後文氣衰濫國朝稍革其弊至億乃振起風采與
古之作者方駕矣景祐初贈禮部尚書謚曰文鎮國
節度使駙馬都尉李勗乞加謚忠字奏雖不行詔付
史館

种隱君江南小集二卷

右种放字明逸之文也明逸洛陽人少時往來嵩華
間慨然有山林之志隱居終南豹林谷自號雲溪醉
叟又號退士聞陳搏之風往見之放作樵夫拜庭下
搏挽之而上曰君豈樵者耶二十年當爲顯官名聞
天下放曰放爲道義官祿非所願也搏笑曰人之貴
賤莫不有命貴者不可爲賤亦猶賤者之不可爲貴
也君骨相當爾雖晦迹山林恐不能安異日當自知
之太宗時召之不起真宗時召爲左司諫攜其手登
龍圖閣論天下事累遷工部侍郎嘗侍宴真宗令羣
臣賦詩杜鎬以素不屬辭誦北山移文以譏之真宗

因出放所上時議十二篇謂近臣曰放爲朕言事甚衆但人無知者耳放一日晨興忽取前後章疏彙焚之服道士服名諸生飲與訣酒數行而卒年六十贈工部尚書集凡二百九十四篇乃淳化三年李介所編者序謂以所集之地定名故曰江南小集云

歐陽文忠公文集一百五十三卷附錄五卷
廬陵歐陽先生集六十一卷

右歐陽文忠公修永叔之文也讀書志云文忠公集八十卷諫垣集八卷希弁所藏一百五十三卷內居士集五十卷外集二十五卷易童子問三卷外內制十一卷表奏書啟四六奏議二十五卷雜著述十九卷集古錄跋語一十卷附錄五卷別一本六十一卷乃舊物也

張文定玉堂集二十卷

右張文定公方平之文也公字安道宋城人明道二年以茂材異等擢爲校書郎神廟時參大政元祐六年終於太子少師致仕贈司空謚文定公出入兩禁垂二十年一時大典多出其手劉忠肅嘗序其玉堂集二十卷乃在東坡所序樂全集四十卷之外淳熙九年錫山尤袤重刻于江西漕臺

范文正公奏議十五卷

右范文正公仲淹之奏議也。皇祐五年韓魏王爲河東經畧安撫使知并州時所序也。公字希文蘇州人。中進士第。嘗與韓魏王開府涇州經畧邊事。元昊請和。名拜樞副除參知政事。以資政殿學士戶部侍郎卒。贈兵書。謚文正。上篆其碑額曰褒賢。別有丹陽集二十卷。東坡先生序之。

王岐公華陽集一百卷

右王文恭公珪之文也。大觀二年詔故相岐國王公之家以文集來上。其子朝奉大夫管勾南京鴻慶宮

上護軍仲修等表進之。許光疑爲之序。公字禹玉。成都華陽人也。舉進士。廷試第二。以左僕射岐國公薨於位。贈太師。謚文恭。紹聖中爲章惇所誣。追貶萬安軍司戶。元符三年。其子仲修訴父冤。乃盡復故官。贈謚。及蔡京用事。又以珪爲臣不忠。入黨籍。哲宗嘗篆其碑額曰懿文。徽宗又賜之曰元豐。治定。弼亮功成。

范忠宣公文集二十卷

右范忠宣公純仁之文也。後三卷乃國史載公本傳及行狀。公字堯夫。文正公次子。以恩補太祝。中皇祐元年進士第。再相元祐之間。元符末。自穎昌以大觀

文中太乙宮使。召以疾不赴。薨。上覽遺表。震悼。贈開府儀同三司。謚忠宣。賜其墓碑。曰世濟忠直。曾文昭公銘之。四明樓鑰序。其文別有臺諫論事五卷。邊防奏議二十卷。又在此文之外。

劉忠肅公文集四十卷

右劉忠肅公摯之文也。忠肅制誥附于後。元城先生劉安世序之。公名摯。字莘老。永靜軍東光人。嘉祐中登進士甲科。元祐六年。拜右僕射。出知鄆州。紹聖四年。責鼎州團練副使。新州安置。薨。詔許歸葬。追復觀文殿學士。中興。贈少師。謚正肅。以家諱改忠肅。

陳忠肅公諫垣集二卷

右陳忠肅公瓘所作也。瓘字瑩中。延平人。元豐二年進士甲科。徽宗朝爲右正言。遷右司諫。坐黨籍除名。勒停送袁州編管。崇寧初。移廉州。又移郴。及尋出仕。黨碑乃得自便。靖康初。贈諫議大夫。擢其季子爲密院檢詳。嘗因奏對。許刊其家集云。

道卿鄒忠公奏議十卷

右鄒忠公浩之文也。龜山先生爲之序。公字至全。常州晉陵人。舉進士。累遷右正言。上疏諫立劉皇后。除名。新州羈管。然世所傳疏其辭。詆訐。蓋當時小人僞

爲之以激怒者也。公之子柄後因賜對首辨此事。且繳元疏副本上之。詔付史館。贈公寶文閣直學士。謚曰忠。

趙豐公忠正德文集十卷

右豐國趙忠簡公鼎之文也。始號得全居士集。周文忠公序之曰：高宗中與用宰相十五人曰忠曰正曰德曰交兼而有之者，其惟趙公元鎮乎。此非私言。高宗大書賜公云爾。遂以名其集。文謂唐用兵伐叛，詔書付宰相，乃下處報機急。武宗必命德裕起草，與公事業如出一揆。又謂德裕自分司東都，貶潮之司馬。鼎奉祠四明，以散官安置于潮。德裕貶朱崖司戶而卒。公亦移置此地。薨。按公薨於紹興十七年。乾道四年，賜謚忠簡。上曰：此謚甚稱。陳俊卿曰：真所謂正直無邪。曰簡，追封豐國公。贈太傅，配食高廟。

胡文定公武夷集十五卷

右胡文定公安國之文也。公之子太常丞寧輪對奏事。上問乃父既解釋春秋，尚當有他論著。其具以進。徽猷閣直學士左承議郎致仕寅遂表上之。安國字康侯，建之崇安人。中紹聖四年進士第。終於寶文閣直學士。謚文定。

吳康肅公湖山集四十三卷別集一卷和陶詩三卷附錄三卷

右吳康肅公芾之文也附錄則行狀神道碑及謚誥周益公爲之序公字明可台之仙居人紹興二年進士中第嘗爲御史歷吏戶禮刑少常伯給事中以龍圖閣直學士致仕卒謚康肅自號湖山居士云

忠恪章公文集二十卷

右章忠恪公誼之文也公字且叟丹陽人崇寧二年進士建炎三年通判杭州苗劉之變公正色以斥時希孟二賊就擒擢倉部外郎累遷樞密都承旨同孫

近使金國歸拜刑部尚書終于端明殿學士提舉明道宮謚忠恪集乃陳季習序

許右丞襄陵文集二十二卷詩二卷行狀一卷

右尚書右丞許翰之文也翰字崧老拱之襄邑人登元祐進士第建炎初元自提舉鴻慶宮召拜右丞屢章丐罷除資政提舉洞霄宮紹興二年以提舉萬壽觀召懇求外祠又乞致仕道卒于吉州贈光祿大夫行狀中載其章疏爲多

李莊簡公文集二十卷

右李莊簡公光之文也。光字泰發，紹興中參知政事。庚申歲，金敗盟，奪河南地。光在榻前，攻檜之短，遂罷。尋謫藤州，移瓊州，又移萬安。檜死，量移郴。已卯，用赦放還，舟行至江州而卒。

洪文惠盤洲集八十卷

右文惠公洪适之文也。公字景伯，紹興十二年與文安公遵同中博學宏詞科，宰臣進呈所試制詞。高宗曰：父在遠，子能自立，可嘉。宜與陞擢。遂除勅令所刪定官。後三年，文敏公邁亦中選，由是洪氏文名滿天下。适以乾道元年十二月拜通奉大夫尚書右僕射兼樞密使。淳熙十一年二月薨於家，前自撰遺表上之神道碑，謚議附於集後。

孫尚書大全集五十七卷

右孫覲之文也。覲字仲益，蘭陵人。大觀二年進士，常以靖康間文字得罪，廢徙久之。終于左朝奉郎龍圖閣待制。

趙中書棲雲集二十五卷

右中書舍人趙昶之文也。昶字莊叔，紹興辛未入奉大對，天子親擢爲第一。嘗卜居溪山間，榜之曰棲雲，故名其集。潘文壽編周麟之所撰墓誌附于後。

徐學士北門集十二卷

右徐鳳之文也。盧壯父刻于瑞陽。

王荆公詩註五十卷

右李文懿公壁所註魏文靖公了翁序。

孔毅文詩戲一卷

右孔平仲毅甫之詩也。向子諲跋之。平仲父延之。字長源。生文仲。武仲。平仲皆登制科。晚又得子極。穎悟多才。思有故人見其三子。旣顯貴。以書勸長源歸休。長源報書云。某又有一子。年七歲。能作梅花詩云。舊葉落未盡。新花開更繁。俟其及第。則致仕。未幾而夭。

黃直講泉書十卷

右國子監直講黃君俞之說也。觀其自序。蓋仁廟時。閩人也。所謂六經關言。二傳節適。三史訓彙。五經續註。六代史記。惜不得而見之矣。

芻蕘集十卷

右從政郎差充嚴州州學教授鄭範撰。進凡五十篇。一曰敘篇。敘述其所以言之意云。

別集類三

河東先生文集十五卷

右如京使知滄州河東伯柳開字仲塗之文也。讀書

志云。柳仲塗集一卷。希弁所藏。乃十五卷。咸平三年。張景序云。緝其遺文。得九十六首。成十五卷。命之曰。河東先生集。行狀附于後。亦景所撰也。開著書號東郊野夫。又號補亡先生。作二傳。以見意。開垂絕語。景曰。吾十年著一書。可行于世。景爲名之曰。默書辭義。稍隱。讀者難遽曉。今載文集第一卷第一篇。凡六百二十三言。

濂溪先生大成集七卷

濂溪先生大全集七卷

右周元公頤字茂叔之文也。濂溪在營道之西。蓋營

川之支流也。先生旣不能返其故鄉。卜居廬山之下。築室溪上。名曰濂溪書堂。以無忘父母之邦之意。學者因號爲濂溪先生。國朝道學始于先生。嘉定十二年。賜諡曰元。太常丞臧格取主善行德之法也。淳祐初元。詔從祀于學。封春陵伯。始道守蕭一致。刻先生遺文。并附錄七卷。名曰大成集。進士易統又刻于萍鄉。名曰大全集。然兩本俱有差誤。今併參校而藏之。明道先生文集四卷。遺文九篇。

右程純公顥字伯淳之文也。太師潞國公文彥博題其墓曰。大宋明道先生程君伯淳之墓。弟頤序其所

以而刻之嘉定十二年謚曰純公取法所謂中正粹精也淳祐初詔從祀于學封河南伯此集并伊川集刻于長沙者南軒先生識其後曰右遺文九篇新安朱熹得之玉山汪應辰者敬授教授何蘊俾嗣刻之

河內先生文集六卷

右太常博士尹源字子漸之文也源與弟洙俱以儒學知名趙元昊寇邊圍定川堡大將葛懷敏發涇原兵救之源與懷敏書曰賊舉其國而來其利不在城堡而兵法有不得而救者且吾軍畏怯見敵必赴而不計利害此其所以數敗也宜駐兵尾亭見利而後動懷敏不能用今此書不見于集中

河南先生文集十五卷

右起居舍人尹洙師魯之文也讀書志云尹師魯集二十卷希弁所藏二十七卷洙傳中所載亦同希弁嘗攷邵氏聞見錄云錢惟演守西都起雙桂樓建臨園驛命永叔師魯作記永叔文先成凡千餘言師魯曰某止用五百字可記文成永叔服其簡古永叔自此始爲古文然二記皆不載于集中

彭城先生文集六十卷

右中書舍人劉攽字貢父之文也攽與兄敞同學自

刻厲博讀羣書遂偕中第或曰原父將死戒子弟無得遽出其集曰後百餘年世好定當有知我者故貢父次其集藏之不肯出私謚曰公是先生貢父平生亦好諧謔與荆公素厚坐是亦相失及死子弟亦次其文私謚曰公非先生然今謂原父之文爲公是集貢父止曰彭城集云

東坡先生別集三十二卷續別集八卷

右東坡先生別集續別集乃蘇公嶠刊置建安而刪畧者淳祐甲辰廬陵郡庠刻

豫章先生別集二十卷黃文纂異一卷

右豫章先生別集乃前集外集之未載者淳熙壬寅先生諸孫營所編也

后山先生文集五十五卷

右陳師道無已之文也讀書志云二十卷希弁所藏乃紹興二年謝克家所敘者或謂二十卷者乃魏衍所編而讀書志不載

清真先生文集二十四卷

右周邦彥字美成之文也神宗時嘗奏汴都賦七千言上命近臣讀于邇英閣由諸生爲學官哲宗寘之文館徽宗列之郎曹嘗守四明故樓忠簡公鑰序而

刻之

玉池先生文集十二卷

右鄧忠臣字謹思之文也卽覆議范忠宣公謚者以此入黨籍欽宗踐祚贈直秘閣

初寮先生前集四十卷後集十卷

右王安中字履道之文也讀書志止載初寮集十卷希弁所藏乃周益文忠公必大序前集中興以前後集中興以後文也內外制二十六卷則李文敏公邴序

西塘先生文集二十卷

右鄭俠字介甫之文也熙寧中監安上門時久不雨公以本門所見飢民及新法之不便者爲圖狀發馬遞經銀臺投進且曰如行臣之言十日不雨乞斬臣宣德門外神宗觀圖長噓命馮京等體量新法而寢罷之大闕倉庾以賑饑民下責躬詔三日大雨荆公率百僚入賀上出奏疏并圖以示之附麗新法者爭言公詆毀良法直奏驚御遂得罪云中興初贈朝奉郎官其孫一人

元澤先生文集三十六卷

右王雱字元澤之文也雱未冠著書已數千百言舉

進士爲旌德尉作策三十餘篇極論天下事又作老子訓傳及佛書義解亦數萬言有以雋書聞者召見除太子中允崇政殿說書被旨撰詩書義擢天章閣待制書成遷龍圖閣直學士雋不拜而卒雋論議刻深常稱商君以爲豪傑之士言不誅異議者法不行嘗勸安石誅不用命大臣政和中封臨川伯從祀于學靖康初罷之集乃崇寧中盧崇編

忠惠先生文集三十卷

右翟汝文公吳之文也公吳丹陽人年十四登進士第徽宗朝爲左史給事中吏部侍郎欽宗朝召直翰苑紹興中參知政事終于資政殿學士提舉洞霄宮私謚忠惠文乃其子耆年編次附忠惠先生家傳于後

梁谿先生文集一百七十卷

右李忠定公綱之文也公字伯紀邵武人寓于常州無錫梁谿因以爲號政和初年進士乙科宣和初爲起居舍人以大水章疏罷黜靖康初爲右丞親征行營使俄知樞密院河東北宣撫使罷知揚州提舉洞霄宮責授昭化節度副使建昌軍安置高宗卽位召拜右僕射凡七十五日而罷後贈少師謚忠定奏議

中欽宗批答爲多集有陳俊卿序朱文公後序

浮溪先生文集六十卷猥橐外集一卷

龍溪先生文集六十卷

右汪藻字彥章之文也讀書志止載汪彥章集十卷希弁所藏浮溪龍溪兩本卷帙皆六十卷藻德興人崇寧二年進士建炎中爲中書舍人權直院紹興中爲兵侍改翰林出知湖州改撫州提舉太平宮黜居于永累赦不宥凡八年而卒藻工於儷語所爲制詞人多傳誦集乃孫覲序

北海先生文集六十卷

右綦密禮字叔厚之文也叔厚高密人登政和上舍進士第仕高宗爲翰林學士終寶文閣學士高密郡侯贈朝議大夫楊萬里樓鑰爲文集序行狀墓誌附于後

致堂先生斐然集三十卷

右禮部侍郎胡寅字明仲之文也章穎爲序然與高閱書責其請幸太學報秦檜書所謂願公修政任賢勿替初志尊王攘狄以開後功之說皆不載焉

玉山先生表奏六卷

右汪應辰聖錫之文也本名洋紹興五年進士第二

黃中以有官遂升洋爲第一。洋乞避遠祖嫌名。高宗以其與王拱辰皆年十八。遂賜今名。

五峰先生文集五卷

右胡宏字仁仲之文。門人張栻所序也。

南軒先生文集四十四卷

右張宣公栻字敬夫之文也。朱文公校定而爲之序。然紫巖某圖跋語之類。皆不載于集中。

晦菴先生文集一百卷續集一十卷

右朱文公之交。嘉熙己亥。王埜刻于建安。黃壯猷嗣成之。識于後。續集則王遂刊而序之。然南康黃西坡

諸處所刻墨帖之類。或不在焉。然則遺逸尚多有之。

象山先生文集二十八卷外集四卷

右陸文安公九淵字子靜之文也。嘗作書院於象山之。以待講學之士。因以自號。集有袁燮楊簡序。嘉定十三年。賜謚行狀謚議附。

復齋先生文集六卷

右陸文安公之兄九齡字子壽之文也。東萊呂太史所作墓誌附。

水心先生文集二十八卷

右葉適字正則之文也。門人趙汝鐙序而刻之。水心

其自號云

貧牕先生初集三十卷續集三十八卷

右陳耆卿字壽老之文也壽老台之臨海人初集葉水心為之序吳子良併刻于江西漕司于中沂即牋表為多

頤堂先生文集五十九卷碧雞漫志一卷長

短句一卷祭文一卷

右王灼晦叔之文也灼遂寧人嘗佐總幕故趙公為之序漫志可以見樂府之源委

鶴山先生文集十三卷後集十卷續集十三

卷別集十一卷

右魏文靖公了翁字華父謫靖州日所作故名渠陽集云

鴈湖先生詩集四十卷

右李文懿公璧字季章之詩也璧文簡公燾之子嘗為叅知政事神道碑附于集後真文忠公德秀所作也

滄洲先生塵缶編三十五卷內外制二十四

卷

右程先生公許之文也先生字季與眉桂枝人嘉定

辛未進士嘗以禮部侍郎兼侍講聖上親御翰墨以桂枝永芳世家及南山滄洲字賜之臞軒王邁爲之序其集希弁生父柳倅墓銘先生筆也

總龜先生松菊集五卷

右阮閱之詩也建炎初以中奉大夫知袁州

三山張先生質言四卷

右張淵叔潛撰叔潛三山人嘗爲左宣教郎樞密院

編修云

石室先生百論十卷

右陸子才所進也君論三十篇政事論二十篇臣論

三十篇攻守論二十篇各有其目云

別集類四

莆陽居士蔡公文集三十卷

右蔡忠惠公襄字君謨之文也讀書志止載蔡君謨集十七卷希弁所藏三十卷乃公之曾孫刑部郎洗所刊者陳叅政駢序

得得居士乘桴集三卷鱉草二卷

右任忠敏公伯雨字德翁之文也公眉山入元豐五年進士爲左正言僅半歲而上一百八疏以黨事編管通州遷儋耳移道州復官提點明道官卒紹興中

累贈右諫議諡忠敏集首刻朱震所作行狀

藏六居士安樂集十二卷

右安定郡王令時之文也王字德麟東坡先生爲字
詭又嘗薦之乞召致館閣以風厲天下紹興初同知
大宗正襲封安定薨之日嗣濮王仲湜言其貧無以
殮乃命戶部賜銀絹百匹兩贈開府儀同三司王薦
宗室宴中所謂和衍自將居貧不撓則有右從政郎
子孟者希弁曾大父清愿先生字醇父也家藏王之
墨跡爲多近時諸賢皆跋之

退齋居士文集二十八卷

右起居舍人侯延慶字季長之文也季長衡山人政
和六年進士嘗侍講筵高宗取杜詩直臣寧戮辱賢
路不崎嶇之句書扇以賜之兄彭老所爲誌銘附集
後

介菴趙居士文集十卷

右趙彥端字德莊之文也德莊寓居南昌登紹興八
年進士第出更麾節入踐臺省凡奏對獻策陳述利
害如蠲丁錢講治體禦敵守邊之謀用兵行賞之規
議論醇正卓然皆有可用之實淳熙十四年江西運
副趙彥操刻之

于湖居士文集四十卷

右張孝祥字安國之文也安國歷陽人紹興甲戌大魁多士明年入館浸登清華至中書舍人出典藩郡孝宗皇帝嘗有用不盡之歎安國筆法妙天下希弁伯祖伯崇得其詩曰趙侯富貴種而有巖壑姿同姓古所敦早晚躡天墀又云德高欲余作字醉中不能謹也安國書德高乃伯祖字也

介庵張居士文集七卷

右張耕字莘翁之文也莘翁嘉泰壬戌進士終于清江別駕希弁妻之諸父也故生父師同爲之序繼而程公許亦序之行狀則今應大叅徯之筆

雪齋居士文集二十卷

右導江王咨字夢得之文也門人計運孫援李漢哀昌黎文章故事爲序咨嘗知劍州其訓詞有曰早登儒科文采著見久更民事爲朕所知云

李泰伯退居類彙十二卷皇祐續彙八卷當語三卷周禮致太平論十卷後集六卷

右李觀泰伯之文也觀盱江人嘗試制科六論不得其一曰吾書未嘗不讀必孟子註疏也擲而出人爲檢視之果然遂下第而歸後以海門簿名赴太學說

書以卒嘗自類其所爲文曰天將壽我與所爲固未足也不然斯亦足以藉手見古人矣其詳見于國朝儒學傳希弁嘗得修梓山寺殿記云應茂材異等科李觀撰然不載于彙中

續元豐類彙四十卷

右南豐先生遺文也建昌郡丞陳東叔魯刊而敘之

掖垣類彙七卷玉堂類彙二十卷

右周益文忠公必大之文也公自爲之序

性善堂彙十五卷

右度正周卿之文也曹文簡公彥約爲之序周卿巴

川人紹熙元年進士嘗爲禮部侍郎

志隱類彙二十卷

右許開仲啟之文也信安陳昉爲之序開嘗爲中奉

大夫提舉武夷冲祐觀清江二王帖開爲守時所刻

東溪詩彙六卷

右許玠介之之詩也周益公嘗親寫其漢宮春夜朱陵洞詞古離別出塞曲四篇而跋之

友林詩彙二卷

右史彌寧安卿之詩也集有黃景說曾丰序安卿嘉定中以國子舍生之望泣春坊事帶閣門宣贊舍人

知邵陽

雙峰猥橐八卷

右舒邦佐平叔之文也開 丙寅劉德秀為之序平

叔豫章雙谿人也

湘中類橐三卷

右楊叔虎文若之詩也環澗王容為之序文若長安

人為武成宮諸生第一嘗任陰平太守得罪謫長沙

云

球楮奏橐一卷

右唐璘伯玉之奏疏也刻于江東漕司籌思堂

字亦文錄十卷

右張翊仲龍之文也李良為之序翊三山人嘗以隆

興倅攝袁州

腹齋詞草三卷

右段允迪之作也允迪濟陽人乃武人之能文者陳

朴厚黃庚序

金陵吏餘四卷

右劉渠帥建康日所作詩詞也

豫章雜著二卷

右馬某分教隆興日所作詩文也

雲壑隱居集三卷浩歌集一卷

右蔡柟堅老之作也柟嘗爲宜春別駕云

閑止堂集一卷

右沈昇德遠之作也趙蕃爲之序昇之子兢莊可亦以詩名自號菊山此集乃莊可之手寫

碧崖詩集五卷

右閣皂山羽士甘夢叔叔懷之詩也叔懷嘗登晦菴誠齋之門楊長孺爲之序

東山詩文選十卷

右葛紹體元承之作也家大酉應繇爲之序葉夢鼎

跋其後行狀墓誌附焉

煮瀑菴詩一卷

右莆陽方左鉞武成之詩也劉克莊所作墓誌附

葛無懷詩一卷

右會稽葛天民無懷之詩也

語錄類

河南程氏遺書二十五卷附錄一卷外書十

二卷

右李籲呂大臨謝良佐游酢蘇昞諸人記二先生語十卷劉絢錄明道語四卷劉元承楊遵道周孚張繹

唐棣鮑若雨鄒柄暢大隱諸人錄伊川語十三卷附錄則明道行狀劉立之朱光庭邢恕范祖禹敘述游酢書行狀後呂大臨哀詞明道墓表伊川年譜張繹祭文胡安國奏狀外書則拾遺也朱光庭錄二卷陳淵本程氏學馮氏本羅氏本胡氏本游氏本春秋錄大全集時氏本傳聞雜記各一卷朱文公記其後

橫渠先生語錄三卷

右張獻公載字子厚之語也公秦人舉嘉祐二年進士歷崇文檢書同知太常禮院議禮不合復以病請歸卒門人謚爲明誠中子呂大臨爲謚議有正蒙理窟二書行于世嘉定中有旨賜謚禮官議謚曰達或者不以爲然改議曰誠或者又以謚法至誠感神爲疑久之乃謚曰獻淳祐初從祀于學封郟伯云

橫渠先生經學理窟一卷

右張獻公載之說也讀書志云理窟二卷右題金華先生未詳何人爲程張之學者希弁所藏橫渠先生經學理窟一卷其目有所謂周禮詩書宗法禮樂氣質義理學大原自道祭祀月令統喪紀凡十二云

元城先生語錄三卷譚錄一卷道護錄兩卷

右劉忠定公安世字器之之語也維揚馬永卿大年

爲之序。器之大名人。中熙寧六年進士第。哲宗朝歷正言左史司諫右諫議中書舍人。貶黜久之。至除名勒停送峽州編管。起提舉鴻慶。復直龍圖閣。以卒。昔有與蘇子瞻論元祐人才者。至公則曰。器之真鐵漢。不可及也。

龜山先生語錄四卷

右楊文靖公時字中立之語也。公閩人。與游定夫謝顯道俱從游于明道先生之門。嘗以著庭兼邇英殿說書遷祭酒。擢右諫議除徽猷閣直學士工部侍郎兼侍講。紹興五年卒。初入見之際。首言自古聖賢之

君未有不以講學爲先務者。上深然之。

上蔡先生語錄三卷

右門人記錄謝先生良佐字顯道之語也。

延平先生問答一卷

右延平先生李侗愿中之語。而晦菴先生所錄也。

晦菴先生語錄四十三卷

右廖德明輔廣余大雅陳文蔚李閔祖李方子葉賀孫潘時舉董銖竇從周金去僞李季扎萬人傑楊道夫徐寓林恪石洪慶徐容甘節黃義剛晏淵龔蓋卿廖謙孫自修潘履孫湯泳林夔孫陳埴錢木之曾祖

道沈儻郭友仁李儒用三十三人記錄晦菴先生之語也李文惠公道傳持江東庾節刻于池陽黃幹書于目錄之後

晦菴先生語續錄四十六卷

右黃幹何鎬程端蒙周謨潘柄魏椿吳必大黃當楊若海楊驥陳淳童伯羽鄭可學滕璘王立行游敬仲黃升卿周明作蔡舉楊與立鄭南升歐陽謙之游倪楊至潘植王過董拱壽林學蒙林賜李儒用胡泳呂燾黃義剛呂壽昌楊長孺吳琮等四十一家記錄晦庵先生語也內五家莫詳姓氏後一卷則前錄廖德明潘時舉董銖萬人傑徐寓林恪所遺也李性傳敘而刻之鄱陽

朱子語畧二十卷

右楊與立編次晦庵先生之語蕭一致刻于道州

師誨三卷附錄一卷

右吳必大記錄晦庵先生之語朱鑑刻于興國近思錄十四卷

右晦庵先生東萊先生集周張二程之說也

續近思錄十四卷

右寶慶丁亥蔡模纂晦庵先生之語以續之

五峰先生知言一卷

右胡子宏字仁仲之說也門人張栻序之曰先生優游南山之下餘二十年玩心神明不舍晝夜力行所知親切至到析太極精微之蘊窮皇王制作之端此書乃平日之所自著其言約其義精晚歲嘗被名旨不幸寢疾不克造朝而卒云近世朝廷嘗索其書而賜之謚

無垢先生心傳錄十二卷

右張文忠公九成字子韶之說也甥于恕編公以紹興三年狀元及第歷禮部侍郎兼侍講謫居南安十四年手不停披歲久庭蹟依然公題于柱曰予平生嗜書老來目病執書就明於此者十四年矣倚立積久雙趺隱然可一笑也因自號橫浦居士寶慶初贈太師追封崇國公謚文忠云

橫浦日新二卷

右門人郎晁記錄無垢先生之說也

南軒先生問答四卷

右張宣公栻敬夫答門人之所問也敬夫魏國忠獻公之嗣子也忠獻都督諸軍事奏以公書寫機宜文字以軍事入見天子異其言詔以爲直秘閣劉珙薦

公學行志業遂與郡名爲吏部員外郎兼侍講除左
司知靜江治狀上聞特轉承事郎除修撰爲湖北運
副知江陵而卒且死猶手草遺表寫畢而絕學者稱
爲南軒先生嘉定八年賜諡

張子太極解義一卷

右張宣公解周元公太極之義也

二十先生西銘解義一卷

右明道伊川呂大防微仲呂大臨與叔楊時中立游
醉定夫尹焞彥明劉安節元承鮑若雨商霖李朴先
之張九成子韶胡銓邦衡許景衡少伊郭雍子和謝

諤昌國劉清之子澄張維祝禹圭錢聞詩子言張栻
敬夫解橫渠先生西銘之義也

無極太極辨一卷

右朱文公陸梭山象山往復論難之書也

復禮齋語錄一卷

右楚澤李著之說也亦名桂林語錄

總括夫子言仁圖一卷

右李著所著也

羣經新說十二卷論五經疑難新說三卷

右荆國文公王安石之說也

傳道精語三十卷後集二十六卷

右李方子編濂溪康節橫渠明道伊川晦菴南軒東萊之說類而集之

勉齋先生講義一卷

右黃文肅公榘所講孟子義二十篇也

總集類

古文苑九卷

右古文苑世傳孫巨源于佛寺經龕中得唐人所藏文章一編莫知誰氏錄也皆史傳所不載文選所未取而間見于諸集及樂府好事者因以古文苑目之

自石鼓文而下曰賦曰詩曰歌曰曲曰敕曰書曰對曰頌曰箴曰銘曰贊曰記曰碑曰雜文皆周秦漢人之作也容齋隨筆嘗引之然訛舛謬缺不敢是正淳熙中韓元吉之記已言之

文苑英華一千卷

右翰林學士中書舍人宋白等奉敕集始太宗皇帝既得諸國圖籍聚名士於朝詔修三大書其一曰文苑英華蓋以諸家文集其數實繁雖各擅所長亦榛蕪相間乃命白等精加銓擇以類編次爲一千卷時太平興國七年九月也雍熙三年十二月壬寅上之

賦五十卷詩一百八十卷歌行二十卷雜文二十九卷中書制誥四十卷翰林制誥五十三卷策問四卷策二十六卷判五十卷表七十四卷牋一卷狀十七卷檄二卷露布二卷彈文一卷移文一卷啟十六卷書二十七卷疏五卷序四十卷論二十二卷議十卷連珠喻對一卷頌八卷讚五卷銘六卷箴一卷傳五卷記三十八卷謚哀冊五卷謚議二卷誄二卷碑九十一卷誌三十五卷墓表一卷行狀十卷祭文二十三卷通一千卷嘉泰改元周益公刻而記于前

樂府集十卷樂府序解一卷樂府雜錄一卷

羯鼓錄一卷

右劉次莊所序也古樂府之所起二十二橫吹曲二十四日月雲霞十九時序十一山水二十三佛道十二古人十七童謠三古婦人二十三美女十六酒六音樂十一遊樂十三離怨二十八雜歌行五十七都邑四十六宮殿樓臺十六征戍弋獵十七夷狄六蟲魚鳥獸三十三草本花果二十五次莊元祐間人也樂府雜錄一卷朝議大夫守國子司業上柱國賜紫金魚袋段安節撰羯鼓錄一卷婺州刺史南卓撰乃唐人也讀書志載古樂府於別集類而載段卓二錄

於樂類希升所藏本乃刊三書爲一集云

國朝二百家名臣文粹三百卷

右論著二十二門策四門書十門碑記十二門序六門雜文八門總目六分門六十二所謂二百家者趙普柳開張齊賢田錫寇準張詠王禹偁孫何楊億劉筠陳堯咨錢惟演种放王曾夏竦晏殊穆修范仲淹孫堪宋庠宋祁余靖尹洙韓琦包拯文彥博孫甫孫抃蔡襄田況石介歐陽修元絳富弼張方平趙抃蘇舜欽祖無擇司馬光范鎮鮮于侁邵泌呂誨邵亢李觀王珪王安石韓維陳襄孫復王令崔公度劉敞王

逢強至章望之劉恕周敦頤錢公輔文同孫覺鄧潤甫孫洙鄭獬楊繪劉放蒲宗孟李清臣梅堯臣蘇洵呂惠卿曾鞏王無咎蔣之奇蘇軾蘇轍程顥王韶張載王回邵雍王鞏顏復胡宗愈劉摯章惇楊傑李常王觀孔文仲孔武仲范祖禹袁默呂陶鄧綰孫覽呂大臨張舜民張商英許安世鄭俠王雱黃庭堅曾肇顧臨史均陸佃龔原王巖叟劉涇劉安世張耒吳拭王安國徐禧楊時吳儔陳瓘晁補之劉夙楊天惠黃裳張剛鄒浩馮澥任伯兩周邦彥程頤秦觀李廌陳師道何去非王庠李之儀蘇過謝逸馬存鄭少微崔

鷓鴣馬涓李新王當侯溥唐庚晁詠之翟汝文范致明
王雲宇文粹中王賞彭俊民汪藻汪伯彥黃定梅執
禮蘇元老劉觀喻汝礪陳恬余安行唐重孫觀李若
水王騰陳公輔韓駒林敏功何臬李良臣洪皓胡宏
范宗尹計有功劉一止熊彥詩楊椿馮時行張九成
趙雍何熙志程敦厚張行成邵博黃成孫王之望李
壽晁公遯劉望之宋遠孫洪邁郭雍張栻趙逵李石
張震張孝祥楊萬里王十朋趙雄

皇朝名臣經濟奏議一百五十卷

右淳熙中趙忠定帥蜀時所進也一君道二帝繫三

天道四百官五儒學六禮樂七賞刑八財賦九兵政
十方域十一邊防十二總議自建隆迄靖康推尋歲
月槩見本末忠定自序於前紹熙之末忠定有定策
功爲任胄誣貶久而論定賜諡追王配食寧廟游侶
誌其神道之碑御篆額曰宗老元勛云

宗藩文類六十卷

右魏邱鑰天銓次也三祖而下各以昭穆編敘之凡
朝廷之所褒嘉者爲詔爲制二十五卷凡名公鉅卿
相與贊述者爲表奏爲記序爲賦頌爲詩歌與夫碑
銘祭文等作二十五卷魏了翁爲之序端平己亥鑰

天自蜀來訪扣未盡之書希弁嘗以一二補其闕渠
深惜太祖派下文宇獨少既而欲以燕王秦王初除
防禦使制達之而未能云

古文正宗前集二十二卷後集十二卷

右集諸儒評論先秦兩漢三國二晉六朝唐及我宋
諸公之文也

諸儒鳴道集七十二卷

右集濂溪涑水橫渠二程上蔡元城龜山橫浦諸公
議論著述也于中有江民表心性說一卷安正忘筌
集十卷崇安聖傳論二卷

宋賢體要集十三卷

右集曾鞏歐陽修王安石王令王安國吳子經周亶
父王雱陳之方蘇軾蘇轍孫洙杜植曾宰鄭獬范鎮
唐介姚闢所作也

憂玉前集四十九卷後集五十卷

右紹興壬戌楊存亮元明編近世諸公舉業雜文類
而次之

中興六臣進策十二卷

右紹興五年前宰執呂頤浩李綱汪伯彥李邴張守
王絢韓肖胄答詔旨所問戰守方畧之策也

中興群公吟橐四十八卷

右中興以來一百五十三人之詩也

四靈詩四卷

右趙師秀字靈秀翁卷字靈舒徐璣字靈囿徐照字靈暉四人之詩也

法帖類

御製太清樓閱書歌一卷

右真宗皇帝御製賜張耆以下徽宗皇帝高宗皇帝跋其後

御製唐十八學士圖贊一卷

右欽宗皇帝御書賜張叔夜

御書真草孝經一卷

右高宗皇帝御書賜尚書右僕射兼樞密使秦檜時紹興九年六月辛酉檜請刻之石上曰十八章世人以爲童蒙之書不知聖人精微之學不出乎此朕宮中無事因學草聖遂以賜卿豈足傳後檜請再三乃從之十四年七月從左宣教郎守殿中侍御史汪勃所請詔令諸州刊石賜見任官并係學籍諸生云

御臨法帖十卷

右高宗皇帝臨晉唐諸人之帖也秦檜跋

御製聖安壽仁太上皇帝聖政序一卷

右寧宗皇帝御製光宗皇帝聖政序也謝深甫跋其
下

淳熙秘閣續法帖十卷

右淳熙十二年三月十九日奉聖旨摸勒鍾繇諸人
帖

羣玉堂帖十卷

右嘉定元年四月二十四日省劄下秘書收省藏蓋
韓平原家本也故卷尾有印曰閱古審定法書之印
永興軍節度使印篇首則三朝宸翰有璽文曰吳娃
之章吳氏書印吳娃翰墨寶章妙墨宜爾子孫世
寶之康壽珍玩皆憲聖慈烈皇后之記也

二王帖三卷

右清江所刻羲之獻之帖也二像冠于篇端引周子
中之言曰心慕二王之人品則瞻之在前手追二王
之墨妙則忽然在後目錄註釋具於卷末

篆書千文一卷

右徐鉉篆周興嗣之韻也希弁嘗攷徽宗皇帝實錄
政和三年四月辛卯詔避廟諱改曰嚴與敬爲曰嚴
與謹勞謙謹勅爲勞謙兢勅籍甚無竟爲籍甚無聲

璇璣懸幹爲璇璣遷幹云

星鳳樓帖

右曹文簡公彥約家所刻也

甲秀堂帖

右廬山陳氏所刻也

鳳墅帖二十卷畫帖二卷續帖四卷

右廬陵曾宏父刻國朝聖賢帖也

東坡先生帖三十卷

右玉山汪應辰聖錫所刻也

山谷先生帖五卷

右張孝祥跋山谷之姪彪所藏卷後引徽宗皇帝評公之書謂如抱道足學之士坐高車駟馬之上橫斜高下無不如意云

張忠文奏議一卷

右張忠文公叔夜圍城中奏議也李綱李彌遜趙子澮胡世將沈調諸公跋其後

趙延康帖

右高宗皇帝賜趙子崧書一幅後用御名圖書其次則子崧與張邦昌一書與王時雍諸人一書親筆也

張魏公帖一卷

右張忠獻公帖篇端紫巖碁圖乃忠獻及陳道遙二老畫像南軒先生跋其下

張宣公帖四卷

右南軒先生帖遺表終焉表云再世蒙恩一心報國大命至此厥路無由猶有微誠不能自巳伏願陛下親君子遠小人信任防一巳之偏好惡公天下之理永清四海克鞏丕圖臣死之日猶生之年臣栻

朱文公帖六卷

右南康黃西坡所藏先生之帖而郡守錢明德并項平菴跋語刻之于中可以補晦翁大全集之闕者爲

多

張紫微帖一卷

右歷陽張孝祥帖尋陽陶思贊所刻

歐陽公集古錄跋尾六卷拾遺一卷

右周益公跋方崧卿所刊雖非石刻亦真蹟也故附於法帖之後

拾遺

春秋集善十一卷

右胡忠簡公銓爲敷文閣直學士提舉江州太平興國宮日被旨投進之書也其說多引易以證之張忠

獻公浚爲之序

論語集程氏說二卷

孟子集程氏說一卷

右左宣教郎建寧府教授湯烈編集程氏二先生論孟說也二先生議論答問散在諸集學者未能徧觀烈取遺書語錄與夫門人編纂之言條而類之于逐章之下續又得論語說一百二十有九孟子說六十有八附于卷末曰拾遺云

論語意原十卷

右東谷鄭汝諧所著也然所原三仁等說晦庵先生多不然之晦庵謂論語只言微子去之初無面縛啣璧之說今乃捨孔子而從左氏史遷已自難信又不得已而曲爲之說以爲微子之去乃去紂而適其封國則尤爲無據矣

疑孟一卷

右溫國司馬文正公光所著也公疑孟子之書有非軻之言者故爲疑孟十有一篇建安余允文乃爲尊孟辨於溫公之疑逐段爲之辨晦庵先生又於允疑之後逐段爲之說云

孝經解一卷

右張文忠公九成所解也

孝經說一卷

右蒙齋先生袁公甫親筆也甫字廣微潔齋先生之子也

大學衍義四十三卷

右真文忠公德秀爲戶部尚書日所進也因大學條目而附以經史首之以帝王爲治之序次之以帝王爲學之本是之謂綱首之以明道術辨人才審治體察民情次之以崇敬畏戒逸欲又次之以謹言動正威儀又次之以重妃匹嚴內治定國本教戚屬是之謂目每條之中首之以聖賢之典訓次之以古今之事迹諸儒之釋經論史有發明者錄之而公之說亦附見焉

小學之書四卷

右朱文公先生所編也有內篇有外篇其宏綱有三曰立教曰明倫曰敬身明倫則有父子君臣夫婦長幼朋友之品敬身則有心術威儀衣服飲食之目又採摭古今經傳書史之所紀載曰稽古曰嘉言曰善行以廣其教而實其事小學之工程大學之門戶也

越絕書十五卷

右越復讎之書也或以爲子貢所作或疑似子胥所作皆無所據故曰越絕誰所作吳越賢者所作也隋經籍志十六卷崇文總目十五卷希弁攷其所以第一卷荆平王內傳第二卷外傳記吳地第三卷吳內傳第四卷計倪內經第五卷請糴內傳第六卷外傳策考第七卷外傳記范伯內傳陳成怙第八卷外傳記地傳第九卷外傳計倪第十卷外傳記吳王占夢第十一卷外傳記寶劍第十二卷內經九術外傳記軍氣第十三卷外傳枕中第十四卷外傳春申君德序外傳第十五卷篇敘外傳此十五卷也然第一卷

有所謂越絕外傳本事一篇此其爲十六卷歟

蔡邕獨斷二卷

右漢左中郎將陳畱蔡邕撰雜記自古國家及漢朝故事王莽無髮蓋見於此

資治通鑑釋文二十八卷

右奉議郎行秘書省著作佐郎兼侍講賜緋魚袋司馬康所集也康字公體溫公之子也

內傳國語十卷

右劉攽慙父所作也以其異於外傳國語故曰內傳云其兄敞原父題辭

神宗聖訓二十卷

右試太學錄林慮所集也慮乃希之族以所聞神宗聖訓記錄分一百門擬續五朝寶訓崇寧中上於朝云

韓忠獻王遺事一卷

右群牧判官朝奉郎尚書職方員外郎上騎都尉強至編次韓魏王琦言行也始韓忠彥編次家傳王巖叟編次別錄至又編次其遺事云

歷代氏族言行類彙六十卷

右武夷章定以歷代迄本朝名賢言行之迹類姓成

編凡一千一百八十九姓云

古今年號錄五卷

右紹熙中臨安府免解進士侯望所進也其說謂自漢建元至今一千三百三十五年正偽年號總八百三十八爲字二百三十五有重用三用至九用者

列子釋文二卷

右唐當塗縣丞殷敬順撰

說玄一卷

右溫國司馬文正公光所著也

天象賦一卷

右題後漢尚書張衡撰蜀丞相諸葛亮注然注中引用晉事決非亮也希弁嘗以秘書省闕書目攷之天象賦一卷張衡撰李淳風注疑此爲是

卷
玄綱三卷神仙可學論一卷形神可固論一

右唐中嶽嵩陽宮道士宗玄先生吳筠貞節所進修行之要旨也一曰明道德二曰辨法教三曰析疑滯玄宗批答云詞簡旨奧義博文精足以弘闡格言發明幽致

國朝官制沿革一卷

右黃元禮琮所編也

職官記一卷

右三晉張續所編也其說謂元豐官制名實正矣惟是祖宗因官制以別流品之意當時初不講明及之故寄祿之階條理未盡若參以舊典則得失可見遂先立元豐寄祿新格以祖宗舊官遷轉之法參列於後云

續文房四譜五卷

右題柯田山樵編蓋續蘇易簡之書也秘書省闕書目云李洪編

夷堅志四十八卷

右洪文敏公邁記異志怪之書也其名蓋取列子所謂大禹行而見之伯益知而名之夷堅聞而志之說者謂夷堅乃古之博物者云

義林十卷

右起居舍人兼中書舍人兼侍講眉山程敦厚所述也凡一百一十二篇撫取千百載人物而尚論之張文忠公九成嘗謂如論姚崇不進制心之說而以十事諫王莽之文姦言起於嚴助朱買臣天誘君子以甚難王伯自用心始鄭伯上欲爲舜下欲爲周公文

帝斗粟之譏所以致刑措景帝殺臨江王天下安之而不疑蕭何萬世之功在王漢中用韓信絳侯無出塞功衛霍有絕漠賞仲連鄒陽同傳平勃合於輿權之說皆深見眇微而發古人用心處議論卓然在人意表云

常譚二卷

右河南吳箕和父雜記經子史傳之事二百餘條

視聽鈔三卷

右國子博士吳莘商卿得之聞見示後人以勸戒凡六十四事云

武昌志三十卷

右郡守古括王信所修也詩文附焉

萍實志十卷續志二卷

右邑宰周世昌所修征官王大節所續也

都梁志六卷

右郡守何季羽所修也詩文附焉

嶺外代答十卷

右周去非直夫記廣右二十五郡疆場之事經國之具荒忽誕漫之俗瑰詭譎怪之產耳目所治與得諸學士大夫之緒談者四百條云

秘書省闕書目四卷

右秘書省見闕書之目也

楚辭故訓傳六卷

楚辭草木疏一卷

楚辭補音一卷

右建寧倅谷水林至所著也李大異為之序

河海英靈集二卷

右唐丹陽進士殷璠集常建李白王維劉謹虛張渭王季友陶翰李頎高適岑參崔顥薛據綦母潛孟浩然崔國輔儲光羲王昌齡賀蘭進明崔曙王灣祖詠

盧象李疑閻防二十四人之詩璠謂諸人皆河海英靈也故以名集凡二百四十二首云

唐賢絕句一卷

右莆田柯夢得所選李白杜甫元結王維韋應物賀知章岑參靈徹張繼郎士元盧綸司空文明韓愈柳宗元張籍賈島陳羽劉禹錫元稹白居易杜牧竇庠竇鞏張祐徐凝王建于鵠朱絳許渾雍陶陳陶李播劉商羊士諤楊敬之司空圖薛能鄭谷王涯李涉楊憑崔櫓劉昭屬陸龜蒙狄歸昌章碣劉得仁許繹吉師老張顛杜荀鶴吳融韓偓韋莊五十四人之作白

止四首甫六首愈八首宗元四首惟牧二十五首云

衆妙集一卷

右汴人趙師秀編沈佺盧象王維孟浩然錢起周賀于武陵李頻秦系劉長卿李嘉祐楊巨源劉得仁朱慶餘雍陶郎士元崔塗皇甫曾皇甫冉包佶司空曙耿緯嚴維李端韓翃戴叔倫盧綸祖詠綦毋潛方干靈一無可護國貫休岑參張衆甫張南史周朴張蠩張祐李季蘭許渾張祐馬戴張循之張繼章八元李益張喬呂溫于鵠崔顥項斯崔峒包何竇常趙嘏薛能劉威鄭谷韓偓羅隱李羣玉皮日休杜荀鶴張籍

任藩劉商楊發處默戎昱于良史王灣林寬劉禹錫
王貞白七十六人之作

二妙集一卷

右汴人趙師秀選賈島姚合詩也

宣和御製詩一卷

右徽宗皇帝賜張忠文公叔夜之詩也凡二十有八
篇云

巴東集一卷

右萊國忠愍公寇準之詩也讀書志云寇忠愍詩三
卷希弁所藏巴東集乃公自編而爲之序凡一百五

十有六篇秋風亭記附按公本傳云巴東有秋風亭
公析韋應物一言爲二句云野水無人渡孤舟盡日
橫識者知其必大用凡五年不得代邑庭有二栢民
以比甘棠集後有范忠文諸公題秋風亭詩然東坡
亦有詩曰萊公昔未遇寂寞在巴東聞道山中樹獨
餘手種松惜不之載焉

晦翁先生朱文公語後錄二十卷

右東陽王似記楊方黃榦劉炎黃灝邵浩劉砥李輝
黃卓注德輔陳芝吳振吳雉林子蒙林學履劉礪鍾
震蕭佐舒高魏椿楊至所錄也其說謂池錄初成勉

齋猶未免有遺恨於刊行之後况饒本又出於其後乎此二十卷皆池饒所未及刊者稽其所自證其所得嘗屢反復焉無一語或敢不謹也又謂晦翁始與南軒講于嶽麓後與東萊及象山講于鵝湖此皆先賢講論大端深恨從游者莫能錄其所聞以示後世云

晦庵先生朱文公語續錄後集二十五卷

右楊方黃榦包揚劉炎劉子寰邵浩劉砥劉礪李輝陳芝黃灝黃卓汪德輔吳振吳雉鍾震林子蒙林學履蕭佐舒高魏椿楊至二十二人記錄晦庵先生之

語也蔡杭將指江東集而刻之

曲江帖五卷後帖一卷

右二蘇劉元城鄒道卿黃山谷王金陵曾文清韓呂諸公之帖也

花藥夫人詩一卷

右蜀孟昶愛姬也青城費氏女幼能屬文長於詩宮詞尤有思致蜀平以俘輸織室後有罪賜死此卷乃王安國寫入館者毛恕鐫于衡陽

昭德先生讀書志卷第五下



君友可言卷三

五

國

